

里

許叔平著

乘

第四冊

進步書
局校印

里察卷七

蘭茗館主著

某公子

姑蘇元妙觀內有太歲祠。向供六十甲子神位。士女各按生年所屬。前往祈禱。每歲春首。祈禱愈眾。香烟燭旦暮不絕。秦中某公子者。意神秀外。素有璧人之譽。弱冠領解。人皆稱其才可問鼎。公子亦顧影自負。以喪偶求鳳。擇選甚苛。會其父由侍御出任。蘇松監司。隨侍遊吳。嘗於春日。至元妙觀。見一女郎。靚妝嫵媚。獨拜太歲。迫而視之。玉貌珊珊。蓋天人也。窺其所拜甲子。計年才十七。心戀神癡。遂屈膝跪諸裙角。拜云。則拜就。締雙鉤。瘦不盈握。愛極忘形。不覺伏巖其脛。女覺身後有人。回首驚見公子。秋波微睨。紅暈兩頰。毫無怒色。拜畢。又頻以目視公子。含笑登輿而去。公子益不自持。亟尾綴輿後。從行二里許。睺女郎下輿入室。默識其地。怏怏而歸。自幸奇遇。秘不敢遽告父母。潛託心腹友。就其地代訪氏族。友復命謂其室主人某叟。固是老儒。只二子遠遊在外。家並無女郎。公子謂友代訪不實。頗懷怨惡。因自往。前地徧訊左右鄰舍。所答一如友所言。心甚訝之。以為白晝目所親睹。豈有差舛。坐是猶疑成疾。鎮日忽忽若失。眠食俱廢。延醫診治。百藥罔效。友人無可如何。密以致疾之繇。備告

其父母觀察公僅此一子。素極憐愛。商之夫人。巫召媒妁。徧為物色佳麗。意在求遂子意。而速已其疾。公子聞之。太息謂友人曰。我病殆不起矣。煩代稟二老人。不必妄費心力。友曰。然則君將奈何。公子歎曰。我前日明明目睹。既無其人。非仙即魅。我魂已為攝去。行將訪彼於地下矣。又何必捨却巫山。而另求別岫之雲哉。友曰。若使巫山雲在。又將如何。公子點首笑曰。非此不可。友人知其情不可奪。又以言備告其父母。因共籌商。折柬召某叟來。從權計議。少選叟至。觀察公降階相迎。見其白髯垂胸。舉止不俗。心甚異之。談次。公笑問叟曰。尊文宅中。向日可否有妖。叟拈髯笑曰。老朽今年政七十矣。自高曾以來。居此宅者五世矣。愧非高明。幸免鬼瞞。公何所見而有妖也。觀察公不得已。以公子所見告之。且問尊文可否有女。叟曰。老朽只有二子。餬口在外。家惟老妻。督率兒婦作苦。並無一女。不然如公子才望。方恐繫援不得也。公曰。豚兒謬荷獎飾。君為一方耆宿。聞見較廣。意中頗有淑女。堪與豚兒妃匹者乎。叟曰。此非倉卒所可報命。無已。老朽有兩甥。頗不惡。公如不論門第。或可塞責。公問令親何許人也。叟曰。妹夫樓某。致媿的裔。以名諸生。曾中副車。無子。僅生二女。幼則教其讀書。妹夫去世。吾妹極其珍愛。欲擇快婿。相依以終。今兩甥長成。尚稱端麗。兼通翰墨。里黨譽之曰。前有。三劉。後有二樓。謂其不減孝綽三妹也。次甥近邁小恙。長甥曾寄老朽為女。容與吾妹

商之倘肯令其遠嫁與公子差堪配匹。公問知年甫十九少公子二歲大喜。亟情叟為道地。謂曾寄名君女。暫請易窮為翁。即就君宅親迎。以釋癡兒之疑。凡此權宜行事。煩寄語令妹。務求曲子成全。俟結褵後。再作別議。無不惟命是聽。叟為人亦甚通達。一一首肯而別。公乃使友風示公子曰。頃尊公召君前所見之室主人。至。譖然老叟。一鄉祭酒也。再三詢詰。乃知渠固有愛女。年已及笄。才貌兩絕。不肯字異地人。凡有問名。悉免鄰舍託詞以謝。尊公再三懇求。渠亦素慕君才望。允締婚媾。君聞之頗快意否。公子冷笑曰。君休相戲。天下豈有此快意事。友正色申誓。以明無欺。公子忻然。推枕起坐曰。田舍奴我豈妄哉。我謂其中必有委曲。今果然也。但未知何日委禽。友謂侯君病愈。公子亟披衣起立曰。煩君代稟二老。我固無病。友喜以語觀察。亟為聘叟之長甥如議。親迎成禮。兩情倍極歡洽。晨興女坐牀。看履。公子敬枕注視。覺女新上鬢。較初見時。尤為豐豔。情不自禁。戲捉女足曰。小生初窺雙鉤。謂瘦不盈握。信然。女訝曰。妾及笄後。母教嚴。不輕出門。君從何處得見。公子笑曰。卿會打謊語。小生為卿一病幾死。卿真不知也耶。女益驚曰。君言妾實不解。請明諭。以免疑悶。公子笑曰。卿真不知也耶。遂厯厯笑述前事。女聞之愀然歎曰。若然是君殺吾妹矣。奈何。公子亟叩何故。女曰。君固不知。叟非妾父。乃舅也。初舅向吾母議婚時。語多顛預。母殊不解。以素耳君名。勉強允

諾。不料有如許委曲。公子亟問究竟。何謂我殺卿妹。女歎曰。君固不知。妾姊妹二人。幼相親愛。妹年十七。少妾二歲。嘗長枕大被擁抱而卧。每談衷曲。願得一可共白首者。同侍中櫛。俾免骨肉乖違。前妹以生辰奉母命。往禱太歲。順道省視舅姑。歸私謂妾。言廟中見一郎君。儀容蘊藉。多情人也。倘我姊妹得同事之。平生之願足矣。妾比讓癡婢。休得嚙語。汝匆匆一面。何由知其多情。妹謂其人情見於面。尾綴與後。直從至舅氏之門。無情者能若是乎。姊如不信。數日必有好音。妾方笑其太癡。久之音問杳然。吾妹失望。竟至成疾。眠食俱廢。醫治無效。其致疾之由。惟妾知之。不敢告母前。妾嫁君時。與妹作別。並以好言寬慰。待囑君物色其人。不謂竟是老奴也。然則據君所言。謂非君殺吾妹。而何。公子聞言如夢方醒。乃歎曰。今而後吾知之矣。大約家君恐小生疾不能起。故商之阿舅。換羽移宮。可謂彌縫甚巧。但卿年齒較所拜甲子差長。面貌較初見時微豐。且諦視頰無微渦。不無少疑。然難弟難兄。亦何酷肖若此。女曰。妾姊妹面貌相肖。多疑孽生。即吾母有時亦幾誤認。今既若此。將焉置吾妹也。公子笑揖女曰。卿妹幾殺小生。賴卿救之。小生幾殺卿妹。亦非卿不能救之。二人之命。生死惟卿脫。卿妹不起。誓不獨生。卿其憐之。女笑曰。君亦無賴矣。容徐圖之。必有以報命。公子笑謝之。亡何女歸寤。見妹瘦如削玉。不勝詫惜。因私謂妹曰。汝以姊夫為何如人也。妹曰。不知。曰。汝

向所謂有情之郎君。即今之所謂姊夫者是也。遂備述公子所言。妹聞之不禁神癡。移時乃曰。嘻。信如姊言。竊為姊賀得人矣。姊如念疇昔之願。不以妹為不肖。願事姊以終身。焉不然。媵之可也。惟姊所命。女泣慰之曰。妹其善保玉體。姊特此歸寧。正為妹事。待商之老母。當無不諧。妹揮淚以謝。既女見母。與叙述壻家瑣事。母問汝壻為人何若。女曰。壻為人溫文爾雅。讀書君子也。母又問其兄弟幾何。女嘆曰。翁姑以男丁單寡。行將為壻謀置簋室。冀多添孫。以昌大其後。母聞之驚曰。我固謂仕宦之家。不可與為婚姻。正為此也。况男子得新棄舊。大抵皆然。果爾。則吾兒休矣。奈何。女頻蹙曰。兒日來亦正慮此事。昨籌得一策。未審母以為然否。母問如何。女曰。母生兒姊妹二人。幼相親愛。假使妹他日又適遠地。姊妹作別。固難為情。即母依壻以終。在此在彼。究不免有所牽累。兒愚以為與其妹歸他人。不如亦適兒壻。一則兒壻免滋別議。再則姊妹得以常聚。即生子亦無分畛域。三則迎母同居。壻分屬半子。二女同壻。則情逾一子。似此骨肉。永得團聚。較為萬全。母以為何如。母沈思良久曰。汝言亦似近理。未審汝妹抱病於意云何。女曰。比視妹恙。謂已小愈。具告此意。渠重同懷情。亦甚樂從。母曰。既女輩樂此。吾復何說。但須與壻斟酌盡善。稟明舅姑。母使汝妹負屈。納采成禮。勿得草草。女曰。諾。既歸。公子亟問所事如何。女搖手曰。已遭阿母譙訶。事不諧矣。君休妄想。公子聞

之悵然變色垂首潛潛欲涕。女遽前以羅巾為拭其面曰：君真志誠種也。妾與君戲耳。何遽若是。爰為笑述母言。公子大悅。起揖女曰：卿真一尊救苦觀世音也。他日卿妹來時。當同以黃金鑄像香花供奉。聯報玉成之德。女笑曰：君亦可謂善於將將。但願魚水偕老。毋忘冰人足矣。越日公子倩其友將此意告知父母。父母以愛憐子故。又嘉新婦之德。一如所議。擇日延媒召儂。鼓吹迎其妹歸。初公與夫人以一時行權。恐新婦來不當子意。既見其伉儷情篤。老懷頓慰。及見其妹。訝與新婦酷肖。後聞友人備述始末。心始恍然。每值兩婦定省時。猶不辨其孰姊孰妹也。乃迎其母同居。公子事之不啻所生焉。厥後姊生二子一女。妹生三子一女。公子由詞館官至少宰。具表陳情。姊妹皆封夫人。並貽封其母云。

里察子曰：天下事有由死而復生。由拙而反巧者。此類是也。初公子自幸奇遇。及一再訪之。而竟無其人。方疑見神見鬼。病不能興。以為死灰決無復燃之理矣。乃羣出下策。權宜行事。冀釋其疑。是誠掩耳盜鈴。不可謂不拙也。迨至窮源竟委。剝焦見心。始知姊妹花開。天然一色。於是因錯就錯。卒使英皇遂願。甥館偕歸。至是拙者反巧。而死者亦因之俱生矣。此事吳人多能言之。每過太歲祠。輒嘖嘖稱道不置云。

相傳雄黃得山川靈氣三千年結成圓顆光明滑澤形類彈丸俗名之曰雄黃彈氣辛且馥
蚺蟒觸之輒死其大者如雞卵小者如龍眼愈大愈可寶貴未易輕得維揚有名妓楊少女
者名巽二字巽巽色藝冠其儔侶年甫及笄聲譽極隆客非具厚贄不見楚北舒生故世家
子容止甚都才華豐蔚以父執某公子揚州為司書記慕姬名厚贄往見鴛鴦導至曲房令
坐少待久之兩婢扶姬出姬時小極新瘥蓬首裹青綃帕縞衣素裳絕無修飾而黑髮白肉
明眸皓齒光彩倍覺照人見生展問邦族彼此略一酬對意甚相洽日昃生欲興辭姬笑止
之曰君去何太急也如不嫌倉卒主人即屈晚餐何如生喜出非望亟答曰唯唯飯畢姬命
婢東幄導生入已室室中奩具之外琴書圖畫羅列滿案生故善琴取壁間琴解囊視之朱
弦玉軫裝潢精潔隨手挑撥其聲清越異常姬曰君亦解此耶生曰偶爾為之此琴甚古卿
從何處得來姬曰此下玉京物也醴賈出兼金購以見貽君不見腹有款識耶生視琴腹鐫
隸書四善二字下有行楷書銘曰風吹空桑水聲浪浪花夫月明心清意涼啟署乙酉春三
月玉京道人九字生閱之極為稱讚謂卿蓄此必是高手請試一揮願為洗耳姬曰久未弄
此今既遇賞音不敢藏拙倘有舛誤乞賜指點乃高捲翠袖輕舒玉腕為譜合歡之詞曰君
何翩翩兮妾何娟娟未見兮心相憐既見兮心相歡花合歡兮並蒂長春人合歡兮如意延

年皆大歡喜。兮。合入天適所願兮。永弗諉。彈畢。笑曰。絃涩手生。君其勿哂。生擊節稱妙。見案有薛濤牋。走筆書一絕贈。姬曰。慶海茫茫幾賞音。玉人為譜白頭吟。多情惟有紅橋月。不照吹簫照鼓琴。題畢持示。姬曰。布鼓雷門。不值一笑。姬微哂曰。白頭吟三字甚好。未審可能成。識。生聽夜漏二下。欲起作別。姬低聲問。君居停較牛。奇章何如。生會意曰。小生有愧樊川。居停憐才。則較勝牛相。姬面發赤。笑曰。果爾。君何妨在此。少叙。生大喜。遂止。弗去。人謂姬平日遇生客之風雅者。或陪一坪。或酬一畫。至厚者贈一詩。曾未有作歌。而以琴譜之者。况一見留髻。尤為異數。姤。生者心殊不平。使人潛語於太守。太守笑謝之曰。君休饒舌。使太牢公笑我。生聞而喜。述於姬。兩人同聲稱感。自是益無忌憚。夙夜必偕。殆有終焉之志。客來姬概謝不見。媪以生為太守客。多不敢與校。亡何太守內擢京卿。生戀姬不肯僭行。而客囊垂罄。益不能厭媪所欲。平日妒生者。又從而交謗於媪。媪益嗛之。生來嘗拒。不令與姬見。姬私謂生曰。始君為太守客。凡事得恣所欲。媪嘗敢怒而不敢言。今已矣。平日妒君者。皆欲報怨。媪日來顏色。君當窺之。脫不早見幾。且不免於禍。因脫金纏臂一雙納生。又贈白金一鉞。趣令速去。且曰。妾年方十八。君方二十有二。請待君三年。以補司勳之恨。爾時齒各未衰。為歡有日。以君才華門第。何患不出人頭地。尚其努力進取。好自為之。莫怪妾此時太忍也。千萬珍

重自愛。生泣聽。姬言一語一首肯。不得已。揮淚而別。迺將白金略償。夙通。趁舟旋楚。比至漢皋。計距家僅百餘里。以無貨賃車。又無僮從。襤被徒行。日暮失路。寄宿郵亭。跋涉勞頓。一偃仰。便已熟睡。平明見巨蟒僵死身旁。大驚。不知何故。俄頃土人畢至。見生訝問姓名。多有知者。羣謂比蟒傷人甚多。方苦無計誅除。今忽就殲。君身有何寶物。生言無之。羣不信。試展其被。見巾裏一物。大於雞卵。有識者曰。此雄黃彈也。君有此至寶。豈不自知也耶。先是姬每於暑月輒患蟲蟻。有漂水藥商贈姬此物。置諸枕畔。凡蠶蟹及蠅蚋蟹蚕之屬。果盡滅跡。生無事嘗取把玩。別時無意攜裹巾中。因識者見。問詭稱祖遺。向實不知何用。其人具言。其實寶難得。羣爭傳觀。咋舌稱異。爰共將死蟒剝皮剝肉。刮鱗解骨。共得大小珠無算。其額上一珠大如湖目。遂以歸生。並各具酒食。延生至家。小住數日。以車送歸。生至家喜。老母無恙。問知妻已物故。不勝傷感。每憶姬約。誓不再娶。將所贈纏臂金變易。營買郭田數畝。養母請書。明年一戰捷於鄉。以母老不願應禮闈試。又越兩年。計已逾約。於無人時。追憶墜歡。不禁潛焉出涕。轉念業已爽約。玉人或別有主。思維展轉。已拚割愛。會有事過洞庭。猝遭暴風。適巡撫某公之任楚南。官艦勢在危急。某公見滿湖客舟漂覆殆盡。惟生舟安穩無恙。異之。亟命傍人議依其旁。果亦轉危為安。命材官持刺召生至。叙及先世。固有世誼。因問生有何術。令舟

無患。生殊茫然。公忽見生角巾上綴蛛絲。瞪視詫曰。君從何處得定風珠。此誠希世之珍。無怪涉險不驚也。生始恍然。因取以獻曰。此珠先世所遺。不意竟能定風。公出入王命。此所必需。敢獻以備濟川之用。聊代羔雁。公大喜。以生誼屬通家。且共患難。令夫人暨眾姬妾出見。並示以此珠之異。乃綺羅絜列。楊姬亦在其中。生與姬相視錯愕。不覺雙淚承睫。公訝問何故。兩人踞陳顛末。公急掖起。掀髯笑曰。數有前定。老夫方愧無以報贈珠之惠。請效合浦還珠。用答嘉貺。何如。生頓首謝。並叩數定之說。公謂前過揚州。聞姬通翰墨。以三千金為脫籍。將令司內記室。便禱諸露筋祠。嘿問後事。得第五籤云。碧雲舒卷碧天晴。楊柳依依送客行。合浦珠還張樂地。公真一笑比河清。今味其詞前二句。明點兩姓。三句暗切洞庭。四句調侃老夫。謔而不虐。謂非數有前定耶。生亦嘖嘖稱奇。公命人送生與姬過船。姬衣飾值數千金。盡令攜去。並餽千金助粧。兩人叩謝。公與夫人感激涕零而別。初生母聞洞庭大風多遭水厄。甚切倚閭之望。今見子攜佳婦歸。大喜。生為母備述前事。乃出金益治田廬。且蓄僕婢。居然類素封家。母無事與姬圍棋。或看姬作畫。彈琴甚歡。因謂生曰。前我以無人侍奉。故不令汝遠離。茲得汝婦事我甚孝。汝如再以我藉口不肯計。借是戀汝婦。即為不孝。汝其奮志顯揚。以慰老懷。生重違母命。是科掟南宮觀政吏部。不數年。洊擢正郎。出守揚州。板輿迎養。舊

地重來。凡向所媒孽者。悉置不校。口碑藉甚。姬受諾命封恭人。每魚軒出。昔之疇侶。俱側目竊視。交口稱羨。生常與姬話舊事。爰倩畫師寫彈珠圖。以誌不忘所自。一時題詠甚夥。傳為美談。

里樵子曰。昔牛竒章裴晉國二公。憐才重義。百世而下。聞其風者。無不津津樂道。乃舒生一生而兩遇其人。可謂盛矣。彈珠圖題詠甚夥。不知至今尚在人間否。杜司勳揚州夢後得此。足以補恨。

有外山王

明成祖文皇帝。既有天下。惡靖難諸忠戮。及十族薄海疑懼。盜賊蜂起。帝竊患之。嘗密使爪士偵察四方。又手詔疆臣。隨時勸撫。兼施並許。便宜行事。其英謀睿斷。多史冊所未載。兜時聞野老言。帝初定鼎燕京。山東巡撫某公。入覲陛辭。帝賜畫一幅。某公旋任展視之。見所畫大海汪洋。重巒疊嶽中。有樓閣似是宮殿。並無題詠款識。公朝夕思索畫意。忽然有悟。麾下某游擊。短小精悍。素極機警。公召至屏去左右。另紙做畫一幀。授之曰。此中有綠林之豪。訪之最確。汝其為我生致之。宜祕宜速。功成不吝厚賞。不則勿歸也。某公素嚴。某不敢辭。貿貿然袖畫歸。泣別妻子。至登萊。才身浮海。聽其所之。值颶風漂舟次一山下。舍舟裹餓。上山

欲窮其境。經旬見前山樹木陰翳中。隱隱有樓閣形勢。與畫略肖。疾行十餘里。至其處。見宮殿一所。巍然類王者居。門外白石鋪地。潔無纖塵。壯夫百數十人。超距擊刺。氣象雄猛。見某叱問何來。內一人曰。勿多言。第拘去。請夫人處分。遂以索反接其手。驅入四重門內。繫諸櫺梧。某惴惴不知何處。自分身死異域。即亦不畏。俄聞呵殿聲傳言。夫人陞殿。命將某帶進問話。又入一重門。見大殿左右武夫數十人。皆躬擐甲冑。佩刀劍。屏息侍立。上坐一女子。年二十以來。珠冠繡袍。顏色姣豔。叱問何物奸宄。敢犯祕境。汝有幾首。不畏死耶。某伏地泣陳。身係客商。遭風覆舟。無意誤犯罪。該萬死。女子又問邦族。某謂晉產。女子喜曰。我亦晉產。與汝有桑梓之誼。合是天意。命左右釋其縛。並令更衣授食。在此少住。俟主人翁來。善送汝歸。某頓首謝。左右導至客房。供給精美。惟見諸人行蹤詭祕。無從詰其端緒。時切憂疑。吉凶不能自決。一夜漏二下。將就枕。忽兩婢秉燭叩門。傳夫人命召某入內室。見夫人頽廢危坐。某屈膝欲拜。夫人急止之。並賜隅坐。夫人問曰。汝知此為何地。此間主人翁為何人耶。某對曰。不知。夫人曰。主人某甲。固海盜之魁也。此山名有外山。人民多穴居。房舍甚少。物產豐饒。家給戶足。向無統屬。主人翁近以威脅之。令歲供賦稅。此山縱橫四萬餘里。主人宮室。凡三十二處。每處或歲一至。或間歲一至。主人初號有外山王。其人孔武有力。日

可行二千餘里。明能察遠。身不在此。此間事。纖末俱知。即君此來。當已備悉。因問某。究為何事。質言勿隱。某窺夫人意不惡。遂以直告。夫人歎曰。我家大同城內。父富有鉅萬。以春日郊遊。被主人飛劫至此。今年二十有七。已閱十一寒暑矣。他日君歸。能為寄語父母。感且沒齒。某起立曰。倘託夫人福庇。萬一生還。敢不如命。夫人曰。主人去此年餘。嘿計旦夕。且至。汝見時。須道其實。主人尚質。稍涉虛言。恐察及隱情。則釐粉矣。切記勿忘。囑畢。仍命前婢送某歸寢。亡何西南風大作。聞眾譁言。大王行且至矣。蓋某甲製鍬甲一領。能避五兵。上綴鍬鈴。一百八顆。名曰鍬鈴甲。每披甲。順風凌空行。五十里。即聞其聲。使人預知有備。鈴顆重一十二兩。摘鈴以擊人。百步之外。百不失一。亦絕技也。時天色微曛。新月東上。某伏暗地窺之。見鋪毯張幔。燦列燈燭。夫人華粧。率眾環跪門外。但聞空際鈴聲琅琅。自遠漸近。約二刻許。一莽男子自空而下。紫面虬髯。目烏喙。脫去鍬甲。內着繡襖。襠足着吉莫鞞。仗劍昂然視眾。略一點首。夫人率眾環拜。謹呼擁簇入門。殿上鼓樂僮儷。肆筵設席。某甲上坐。夫人跣進三爵。起坐左側侍飲。少選庖人進蒸豚甲。拔佩劍齎切大嚼。徐問別後事。夫人唯唯以對。又問有遠人來未。夫人謂某月日。有某至此。甲笑謂我固早料及之。即命某來問話。某至。但長揖不跪。甲問汝居何官。某憶夫人所囑。直答曰。忝官遊擊。殊不稱職。又問汝來何為也。曰。巡撫某

公慕大王威名。欲一望見顏色。故使末將為致殷情。甲冷笑曰。此燕藩之命。某公焉足知我。某曰。末將實奉某公令。不知其他。甲曰。汝膽亦非小弱。居然不遠而至。豈謂我劍不利耶。某對曰。某公將令素嚴。大王所知也。明知違令死。奉令而遠犯虎威亦死。等死也。違令其死速。奉令而乞憐於大王。倘憐末將之死。肯賜一行。以大王神威。行止可以自由。某公又將奈之何。且大王若去。某公方將結納之。不暇。豈敢有他圖哉。果爾則大王不過一舉趾而末將即可因之不死。他日餘生皆出大王之賜矣。惟大王憐之。甲沈思久之。曰。汝且退。容細思之。某拜謝而出。甲亦罷席。越數月。某見甲曾不述及前事。亦不敢促迫。姑耐候之。一日忽聞甲大譙賓客。為某祖餞。某竊自慶。頃之使者來召。某喜從而去。某甲冠服立階。某至笑執其手。迎入大殿。殿中凡設數十席。所謂三十二夫人。及部下謀士武夫。濟濟畢集。甲一一指道姓名。某俱與為禮。中一席某坐客位。甲坐主位。餘席按班環坐。甲飛三巨觥謂某曰。今日為君祖餞。須滿引勿辭。某稱謝立飲。亦飛三巨觥相酬。甲飲訖。乃掀髯謂眾曰。我忝據此山。十餘年矣。本期與爾曹共圖大事。今燕藩部署粗定。已洞悉我底蘊。我復何望。茲某巡撫使某來通殷情。是必燕藩之所指授。已許同某一行。我其不歸也矣。夫人及眾聞之。皆掩面而泣。食曰。大王何出此言。以大王神威。即永據此山。亦可優遊自適。何必以千金之軀。遠涉險阻也。

甲曰。我意已決業許之矣。爾曹毋得多言。惟與爾曹約。此去如某巡撫執禮甚恭。則已。不然我匝月必歸。再作別計。或未知鹿死誰手。如匝月不歸。諸夫人等俱聽自便。所有子女玉帛。爾曹可瓜分之。或入海。或入山。各自為計。慎勿繫念瞻顧。徒自取苦也。眾嘿嘿相視。不置一詞。俱飲不盡。懽而散。越日。甲召某登舟。並戒眾勿送。比至舟中。則大同之夫人在焉。甲指為某曰。是與君同鄉。煩為寄語其父母。好為安置。渠所攜金玉珠寶。一生喫着不盡。某姑漫應之。問甲共有幾子。甲謂諸夫人類生而不育。今有娠者。尚八人。然我躬不閱。違恤我後。君亦何必多問也。某深歎其豁達。於是相與沿途共覽山川形勢。甲喟然歎曰。實不相欺。我初據此山。聞燕藩抗命。屢欲興一旅之師。前往問罪。既思故主出亡。神器有主。一家之物。仍歸一家。天命有歸。豈人力所可爭哉。及將至登萊。乃謂某曰。計日達岸。煩君先馳報巡撫。某公須從我三事。可則行。否則止。某請其說。則曰。一我登岸後。某公須率所屬文武郊迎於五十里外。一我此去。即於巡撫署。栖止進署時。我乘輿。某公騎馬。作先導。洞開重門。由中道直入宅門。一飲食務極豐腴。每日須擇好梨園演劇。侑觴。所需犒賞。不得少吝。祇此三事。可則行。否則止。某曰。諾。達岸即先馳報。尋復命。曰。某公聞大王至。大喜。所約三事。無不惟命是聽。進署後。某公執禮甚恭。曲盡綢繆。甫匝月。甲忽謂某公曰。聞諸公子極佳。願請一見。公即令六

子出拜。甲一一相之。曰：某清貴某方面某民社某部曹某鄉貳。惟四公子頭角崢嶸，勲業在公之上。指所佩劍曰：此出自吳大帝家中。當日六劍之一。所謂流星者是也。當以相贈。公為稱謝。甲笑謂四公子曰：今夜與老夫抵足如何。公笑曰：童子何知。合當遣事長者。是夕果使同寢。平明甲起，喚四公子曰：為吾謝而翁。吾事畢矣。拔所佩劍曰：請以相贈。遂自剄而死。撒手以劍授公子。頭雖斷而身僅立不仆。四公子大駭，趨以告公。公喜，以禮殯殮之。具實入告帝。大喜。爵某公以國公。某遊擊超擢總戎。並予伯爵。大同夫人以父母命歸某遊擊封夫人。後四公子由詞館出入將相，以征虜功封爵。國公餘公子所官亦俱如甲言。

里察子曰：昔永樂時，魚臺妖婦唐賽兒謀逆，或借其事撰女仙外史，稗說謂為靖難諸臣雪憤。今証以野老所言，或亦有因。惟某甲能知天命，甘心伏劍，使一切篝火狐鳴妄布非分者觀之，亦可爽然自失矣。

蔣柿姑

蔣柿姑，楚北士人女也。幼失怙恃，育於孀孀。年及笄，美而慧，以針黹佐孀。食用相依為命。孀有子椒哥，少柿姑三歲，從塾師讀。晚歸，柿姑必課其日所業，若何意，藉自求識字也。久之，竟能粗通文理。孀益愛之，媒妁議婚。高低多不就，里有某公子素漁於色，偶見柿姑貌，豔之，冒

託瓜葛親時來相挑。柿姑窺其意，恒避不與相見。某計貧士女，當可以利誘，問媼他出，特華服而往。柿姑見某來，遽闔其戶。某脫纏臂金，自窗擲謂柿姑曰：「卿視此物好否？」柿姑大怒，擲還罵曰：「汝卿誰？誰是汝卿？汝以此為好物，盍將去獻汝母，固不失為孝。不則給汝姊若妹，似此齷齪物，休污我肉也。」某知不可犯，拾取銜恨而去。媼歸，柿姑且哭且訴。媼性最烈，眾所敬畏。詰朝登某之門，聲其罪而痛數之。某匿不敢出。隣里再三緩頰乃已。某羞且忿，從此絕跡。媼有兒子，幸生少孤，母課之讀書。十六歲，母沒，遂廢讀成人。後意氣軒昂，性黠而介。家徒四壁，自命甚高，嘗道拾遺金，坐待其人而歸之。聞者多哂其癡。會歲暮，有同學友黨業於隣翁，浼生居間書券，翁酬白金一流，以資潤筆。友固與生善，又另贈白金一流。生得金，徒製袍服，竟體華美。獻歲詣媼叩賀。媼訝曰：「幾時不見？何一旦光彩若此？得勿發義財耶？」蓋楚人謂掘窖為發義財也。生微笑漫應之。媼益疑為真，固詰不已。生無奈，何曰：「何必窮究？後自知之。」媼曰：「是矣，愈祕之愈久昌也。」蓋楚人每掘窖，雖親友皆祕不肯告。向有祕一年富萬千，祕一代富萬載之說。故媼云然也。夜間媼悄悄告柿姑，幸生大發義財，且祕不肯語我。此事愈祕愈能久昌，我亦不便窮究。惟渠年少，難保不無浪費。我見汝日長，尚未字人，時切憂慮。汝如肯嫁渠，佐治生產一舉而兩善皆備。汝意云何？」姊姑面頰不語。媼又詰之，良久答曰：「如大人審得。」

良確。兒無不惟命是聽。媼喜曰：我審之極確，復何多疑？越日以告辛生，命即請冰速為訂盟。幸生辭曰：此兒一生大事，家本寒素，何敢孟浪？媼笑曰：汝休狡獪，吾意已決。此後一切禮節，仍舊從儉，吾不汝苛也。生迫於媼命，尋遣媒草草委禽，親迎而歸。枏姑至生家，見室罄蕭條，別無長物，偶叩生是否真發義財，生但笑而不言。枏姑歎曰：貧富命也，妾亦不怨，男兒不讀書，究無長進。君果肯下帷，妾判勞十指，亦不至凍餒。君願之否？生笑曰：讀書是小生分內事，有何不願，但累卿十指於心，良不忍。卿無憂，小生自有治生策也。枏姑以生言殊涉恍惚，恚曰：若是，君果發有義財，祕他人何亦祕妻耶？生笑曰：至時自當相告。他日生出，枏姑見後，有小院蓬蒿滿徑，試徧鋤之，果於牆角見甕口，再發之，白銀纍纍，大喜，仍覆以土。越日生有急將質物，枏姑笑曰：君休矣，明明有財不用而質物，寧非真耶？生聞而驚，既而曰：汝何知我有財耶？枏姑笑曰：汝祕不肯告我，而謂我終不知耶？迺笑攜鋤，奉生裾至牆角，掘之，甕口畢露，白鏹充牣。指讓生曰：此何物耶？而謂我不知耶？生大喜，乃詭答曰：既卿知之，亦復何祕？然置此終非長策，不加運而藏之為是。枏姑笑曰：然，兩人竟夜運取，共討五千金，有奇。枏姑謂得財，但祕而不用，是守財奴也，復何益哉？乃漸出金置備產業，不數年，良田夏屋，居然素封矣。初某公子為枏姑所侮，心時銜恨，既聞嫁生，且暴發義財，益羨且妒，爰賄劇盜，指生為窩。

藏以圖雪憤時生果遵妻教讀書已入邑庠枏姑以秋闈伊遜督攻舉業甚嚴忽蒼頭湍汗來言有縣役持簽到門謂主人窩藏劇盜立提候訊生聞面色沮喪枏姑讓之曰君豈真窩藏者耶何懦怯之甚也生曰奈何枏姑曰妾思此必仇人所嫉斷非畏避可以了事君第挺身赴公堂侃侃辨論堂上官未必果不分皂白萬一憤憤誰良誰莠鄉里自有公論妾當鳴眾紳衿同上公詞辨寃如一畏避則假反成真轉為仇人所笑也生聞膽氣頓壯立願赴邑辨白枏姑乃自見來役命之曰我家官人在家讀書素安分守法今為仇人所嫉橫被盜誣既蒙邑宰提訊理合前去辨白今將官人交汝好為照拂大錢十千聊備不腆俟無事回家當另犒賞如妾恣魚肉九閩雖遠勿謂我女流不能披髮上叩也初縣役所望甚奢今見枏姑容光照人且復語言剛決料非善弱只得唯唯聽命生既至縣暫寄囹圄邑宰並不訊問枏姑不時使人探視待至十日更不能耐乃折柬徧招紳衿肆筵設席席罷枏姑於屏後白所求眾人彼此相視默無一語枏姑知眾無能為助不禁浩然長歎含淚歸房乃自走筆具詞為夫辨寃翌辰遣僕賫呈邑宰中有聯云將錯就錯參乎幾誤殺人以訛傳訛回也豈真霸產罕見詞數賞立提生面訊既問汝同鄉有蔣九成上舍曾識其人否生叩首對曰蔣上舍即生外舅宰改容起立曰上舍固吾師也然則汝妻即上舍之女無怪立言得體也遂以

柿姑所上之詞。付生閱之。即日出生於獄。邑宰某公。固長白人。父官都統。柿姑之父。少以諸生納粟太學。應試京兆。都統延課其子。即某公也。今由筆政授邑宰矣。柿姑襁褓失父。九歲失母。兒時彷彿聞母言。汝父曾在京授徒。而不知即公也。生歸述公語。柿姑大喜。屬生衣冠往謝。公於師誼最為惓惓。越日枉駕答拜。並請見柿姑。問師身後事甚詳。聞柿姑終鮮兄弟。不勝歎息。並遺以錦段筆硯等物。臨行。柿姑謝且請曰。寒家賴公袒蔭。幸免覆盆。願平日與盜無仇。是必有人指使。尚求研究。昭晰幸甚。公點首笑諾。歸署果提盜研訊。初不肯吐榜之。乃供稱為某公子所誘。公怒。飛簽提究。某大懼。請生謝過。並求關白。願以千金為壽。生辭曰。窩藏劇盜。罪名非輕。誣人者應自坐之。復有何說。某益懼。漸增至三千金。生入以問柿姑。柿姑笑曰。破慳囊助君膏火。計亦得賞。告公當無不諾。且冤宜解不宜結。怨者以德遇之。善莫大焉。願小人多反覆。必先令彼輸金。而後為道地。乃萬全也。生曰善。出以告某。大喜稱謝。即日果贖金以獻。生詣公備告。所以公喜諾曰。我方為君籌膏火資。而苦無法。若此甚善。某幸免究。深感生德。前隙盡捐。自是公常召生至署論文。夫人亦時與柿姑來往。公嘗問柿姑賢妹。前詞謂回也。霸產典出何書。柿姑掩口笑曰。妹子儉腹荒疏。以參乎。殺人無對。因憶聊齋誌異。載有原壤控顏回一事。姑戲拈湊塞責。原屬一時急就。既擬用拾塵故事。將霸產改盜。

食二字。以業已繕好。懶再塗鴉。果為大方家所笑。公贊曰。誌異雖小說。將來必傳。足見賢妹無書不窺。霸產二字較盜食為新鮮。不改何害。杝姑感孀教養。迎其母子同居。後生成進士。官部曹。椒哥領鄉薦。官中翰公。由邑宰洵擢楚撫。彼此以通家之誼。休戚常相關焉。

里孳子曰。幸生待還遺金。杝姑擲還纏臂金。一介一貞。均是天生嘉耦。義財必待杝姑掘發。天賞生之介。實天賞女之貞也。或謂孀為幸生所愚。不知生初固無愚孀之心。而孀忽啟疑團。迫成夫婦者。亦夫使之。非生愚之也。願生聞孀窮問。但含糊不辨是非。即此足見其黠。固無足怪。惟睹杝姑掘財。猶詭答不肯實言。此點而近於詐矣。吾無取焉。若杝姑天性英爽。觀其責斥某公子。與面命邑役之言。何等光明磊落。而破慳囊以助膏火。怨者以德遇之。立論尤為諦當。真非尋常男子所可及。所謂健婦持門戶。終勝一丈夫者。非耶。得婦若此。即不掘義財。吾決其家道之必昌也。彼公子圖人幾反。自坐輸金。獲免猶屬幸事。禍人轉以福人。射影含沙。徒勞心計。紈袴少年。當奉為殷鑒。至邑宰某公。悽悽不忘師誼。存心甚厚。其適然來宰斯土。意者亦彼蒼預為位置歟。不然。何其巧也。杝姑之父名韶。幸生姓名。則予忘之矣。

活佛

江南某生。客遊棧舟。江濤登岸。獨自遊覽。信步至一蘭若。闕其無人。見內殿板壁所畫山水。

人物甚工以手摩挲不覺巧觸其機壁上門忽洞開內有婦女數輩正與髡奴擲倒為戲瞥見生叱問何人。生大駭急趨而出。僧徒三五人躡跡馳追。將生挽回。生泣哀之曰。乞師慈悲。恕我無知。誓不饒舌。僧眾叱曰。汝自尋死地。尚望生耶。一僧曰。搯之使。一僧曰。搯之不如烹之。較易滅跡。生聞而餒餒料不能脫。再三哀之曰。小生冒犯。自知無再生理。求師慈悲。賜全要領。其功德勝於浮屠合共矣。一僧曰。吾佛慈悲。姑念無知。其言也哀。將來送活佛。生天我輩可藉漁利。較為得計。僉曰善。遂將生髮剃淨。幽諸密室。飲以瘡藥。日給淡食。不入粒鹽。百日肌膚肥白如飽。且腰脚柔軟不能行立。乃於郊外架木為高臺。謂某日活佛肉身跌坐臺上。涅槃示寂。藉火化以生天。舉國男婦聞之。扶老攜幼不遠而來。皆香花頂禮。瞻拜祈禱。一唱百和。舞蹈若狂。郊外距邑城密邇。邑令某公健吏也。耳其事。率幹役數人。微服自往。詎察見臺高丈餘。一僧戴毘盧帽。面白皙如滿月。身披五色袈裟。趺足坐榻上。閉目淡沓。下如雨。臺下僧眾百數十人。各執魚鈸。鼓磬笙簫琴阮。旌幡羽蓋。循環繞繞。喃喃奉經禮懺。眾男女從其後。同宣佛號。一體膜拜。臺前後左右置新絮。間雜旃檀紙帛。高等邱陵。待時至。舉火送活佛。生天。公謂活佛生天。復何流涕。豈尚有塵緣難割耶。初固疑其妄。睹此益信。亟遣幹役馳白主僧。曰。邑侯聞活佛生天。歡喜無量。親來拈香。諭眾暫緩舉火。僧眾素知公威嚴。不

敢有違。亟含笑答曰。邑主肯賜降臨。為我佛之光。僧等曷勝榮幸。理合敬候。公亟反署。盛設儀仗。而至。僧眾合掌前迎。公問活佛何在。主僧笑指臺上。謂跌坐者。即是活佛。並詳述其平日清修高行。公噴噴稱歎。謂今日天刑活佛生天。恐未能遽登極樂之界。暫請改期何如。主僧答稱。此活佛自訂日期。未便擅改。公笑曰。活佛未曾留意憲書。下官忝主一邑。合為改正。明日天赦。生天最吉。請活佛在邑署暫住一夜。藉使署中細弱。得遂瞻拜。主僧答稱。活佛功行圓滿。即絕口不言。又肉體尊重。不使行動。礙難進署。公笑稱。我自有法。即命健兒數人。將活佛舁至署中。僧眾箝口相視。不敢阻止。又莫測公喜怒。殊切懸慮。活佛既至署中。公命安置內記室。夜半潛自研詰。見其涕淚交併。言動俱絕。心知有異。因問能作字否。活佛點首。亟命將筆硯。至。活佛胖軟臂不能舉。惟以指蘸墨書紙上。歷叙顛末。公閱之大怒。命活佛安心。藥食調治。俟差愈。牒送回籍。翌日諭寺僧齋集臺下。毋許擅離。又密牒騎尉督營卒多人。乘僧等出後。圍寺窮搜。果獲婦女數人。所藏金珠衣物甚富。公至臺下。僧眾請迎活佛。公笑曰。活佛有命。請主僧替代生天。主僧大懼。恐稱知罪求宥。公叱左右。將主僧縛擲上臺。又指主謀助虐數人。謂當追配。亦命同縛擲臺上。叱令舉火。火烈風猛。一轉瞬俱成灰燼。僧眾環視。面如死灰。觀者聞知其事。同聲稱快。公命將餘僧答責。諭令蓄髮歸農。其婦女各歸親屬。

乃將寺改為義塾。即變易其金珠衣物。以資膏火云。

里孫子曰。髡奴託名三寶。無惡不作。茲以人命漁利。愈出愈奇。邑令某公。請君入甕。以其道還治。其人較西門令鄴更為稱快傳者。逸其姓名。惜哉。

禮部書吏

明萬曆時。禮部書吏某。窮乏無以自存。時值歲暮。益難為計。聞術人李實中。精星命。特袖例金。往求推算。李細玩命牋。嘆曰。論尊造。乃鉅富之命。奈終身無一佳運。殊屬可惜。某請其說。李曰。命由舟也。運由風也。雖有巨艘。不遇順風。亦惟有膠擱淺渚。聽其腐朽焉而已。何足貴哉。某聞李言。嗒然若喪。久之復詣於李。曰。據先生言。鉅富非所敢望。尚求細推。未審得免。餓填溝壑否。李又為掐指輪算。忽訖曰。奇哉。奇哉。尊造以演禽之法。測之。明年五月五日午時。當有昴日。難到宮。昴宿在十二地支屬酉。酉內藏金。金星透露。主有意外機緣。雖鉅富可唾手而得。此巨艘遇風時也。君其識之。過此以往。則非鄙人所敢知矣。某不敢再演。酬以例金。李却之。曰。此芟芟者。暫存尊處。俟所言果驗。當以千金酬我可也。李笑曰。諾。既歸。憶李所言。疑信參半。迺瞬屆端陽。落莫較常。尤甚故事。每節必留一人在部。聽差其儕。知其避債。難以歸家。因共贖錢三百。饒某聊賞有酒。在部伺應。某乃沽酒一瓶。置書架上。又出刀齧切羊脯。

將備賞午。忽書架上兩鼠相鬪。將酒瓶觸翻墮地。砰然一聲。已成粉碎。某停刀瞪視。頓憶術士所言。不禁喟然長歎。曰。承諾君高義。瓶酒且不能享。尚何望意外機緣哉。比視架上薄牒。已被酒漬濕。恐係要件。急取繙閱。乃三年前琉球國冊立世子表也。以列表無甚關繫。其心始定。因將瓶瓦拾拋院中。又取濕表。將就日中曝之。甫一掉頭。忽門外一人迎面而來。揖問某曰。此是禮部有書吏先生在此否。某觀其人。條琉球國衣冠。嘿自驚訝。即拱手答曰。小人便是書吏。未審有何見教。其人笑曰。下官乃琉球國使臣也。今為冊立世子一事。特求幹旋。望勿見拒。某問如何。使臣四顧無人。乃謂某曰。三年前冊立世子。曾進表大國。不謂世子荒淫無道。頓失國人之望。頃我王與大臣會議。將廢而改立。以前已進表。不敢擅專。今特謀諸先生。如將前表抽還。俟改立既定。再行進表。泯去廢立之跡。較為得體。如事幸成。不吝重謝。某聞使臣言。故為沈吟良久。乃答曰。事關廢立。非同恒泛。不敢輕諾。然必以慎密為要。倘一泄漏。為害非淺。此地耳目甚多。不便商議。請約定翌辰於前門外酒館報命何如。使臣笑曰。君言甚善。謹遵所約。萬勿失信。幸甚。某送使臣去。後試測日影。却是卓午。自知術士之言有驗。翌辰前往酒館。使臣已在此久待。見某至。含笑相迎。曰。先生來何遲也。某笑曰。非敢來遲。但為君故。費煞經營。昨訪知此表為吾儕某甲所藏。某甲為人猾而貪。不足與謀。已施小策。

將此表賺出。一俟到手。即行奉獻。未審事成。果何以犒小人也。使臣笑曰。如果事成。以三十萬金相酬。何如。某曰。三十萬金原不為菲。惟賀貴國廢閣立賢。兆民是賴。小人不為無功。敢請少益。使臣笑伸五指謂曰。君言是也。事成請以五十萬金為先生壽。先生好為圖之。愈速愈妙。某笑曰。諾。遂訂三日獻表。兌銀果唾手而得。鉅富。其儕竟無一人預知其事者。某尋罷役歸鄉。潤屋買田。以財雄一方。迺延術士於家。以千金酬之。

肇慶府署五異

廣東肇慶府署中。異事有五。一署有金甌二十四方。方各十餘斤。其色黝然而光。完好無少缺損。或攜以安几榻。或疊以度什物。均可。倘欲竊而藏之。則頭立痛。寒熱交作。送還即瘥。一署後有枯樹一株。枝幹杈枒。禿無片葉。不知何代物也。土人言是張四姐搖錢樹。每新太守至。必具衣冠拜之。否則不吉。一署堂皇。前有破甕。大容數石。傳為鎮妖之物。新太守至。亦必拜之一。署內有空屋一椽。封鏽甚嚴。相傳宋時。包孝肅守肇慶。日理陽事。夜理陰事。此名覆陰堂。其理陰事處也。太守來者。尤不敢不拜之一。堂皇有古井。上覆以石。言是孝肅治水。怪於其下。人不敢啟視。舊有包收陸放馬成潮之謠。自來太守無姓陸與馬者。聞曾有陸姓捧檄來守此土郡。人大懼。紳耆聯名哀稟於上官。尋將陸太守調任他郡。否則一郡陸沈矣。此表

石畦參軍起為予言者。其叔祖香亭先生。曾守肇慶。故知之最詳。

鬼批縣尉頰

如古香尚書荼。未達時暑。夜偕同學友三人。在城外大橋避熱。三人者。後一為方伯。一為太守。其一則為縣尉也。其時皆布衣。同至橋上。見石欄杆上。坐一女子。月色昏黃。面目不甚可辨。意其亦為避熱來者。諸公席地而坐。上下千古縱談甚歡。少焉月至中天。較前皎潔。照見女子面色慘淡。羣疑非人。少年選事因議。分立橋四隅。阻其去路。得以觀其變相。藉博一笑。夜色將闌。女子果起身在橋上。兩頭蹀躞。苦不得去。既而雞聲亂啼。女意甚急。忽騰身起。以掌批縣尉頰。罵曰。汝不過一縣尉耳。亦欲與阿娘作梗耶。其人畧一側身。女子歛已不見。此周涑人刺史言者。古香尚書。其同鄉先達也。

里祭子曰。鬼能預知人爵秩大奇。豈以諸公之中。惟縣尉官階最卑。氣燭亦較殺。擇其可欺者而欺之耶。吁。鬼之揶揄。亦何虐哉。

庚午神誅水怪

周涑人刺史又言。某年暑月。湖北木商。運筏至九江關。忽江中一爪大於箕。抓其筏不能行。後筏來者愈多。遂將江路梗塞。或謂木商是必獲罪江神。宜以少牢祀之。商從其言。刑牲饗

血醜酒祭禱。爪卒不釋。或又謂是必後藏有妖商不得已折筏去木。甫六層見中藏一蜴蜥。長五尺許。躍入江中。爪款不見。俄頃波浪大作。風雨雷電併至。怒濤掀簸。聲如萬馬奔驤。震耳駭心。舟人無不戰慄失色。忽霹靂一聲。一物死江干。形類蜴蜥。長丈餘。其腹中製有篆書十一字云。水怪為患。帝命庚午神誅之。

金毛吼

周涑人刺史又言。道光初年。江蘇崇明縣鄉村秋穫後。地中無故火起。延燒人家甚眾。其處舊有古塚。一日風雨驟至。一物自塚中出。形如狻猊。竟體皆火。所過草木盡灰。空中數龍下與物鬪。雷電隨之。且鬪且走入海而去。海水為之沸騰。經日始定。或曰。其物即金毛吼也。

蜘蛛怪

海州海中。有母子兩蜘蛛。母大於箕。子大於釜。濱海居民皆見之。嘗秋日未晡。登場積草。隆然如山。小蛛戲以鬢吹之。堆草亂飛。俄頃盡淨。道光八年五月十四日。暴雨如注。天大雷電。以風大。木斯拔。海濱居民見大蛛起懸空中。五龍環繞。蛛故縮其足。伺龍將及身。足怒伸如勁弓。反弛。龍即四散。蛛又縮足。龍來又如前。怒伸卒不能近其身。蛛又吐絲縛龍。爪膠不能開。賴火龍來燃其絲。爪乃不為所縛。相關逾時。仍入海而去。翌日。人拾所火斷絲粗於臂。或

盛丈或盈尺。兩健兒持兩端。而力挽之。竟不能斷。

驪鞍卿

方伯融公子燕昭言。粵有驪鞍卿者。明中葉時於羅浮出家學道。今四百八十六歲。其子孫甚蕃。衍嘗至羅浮。叩請其祖回家。一省祠宇。鞍卿初不許。求之至再。乃首肯。遂以肩輿舁至宗祠。約炊許。即欲還山。子孫環拜請曰。老祖宗既歸。何不少留。鞍卿讓之曰。此間鹿俗氣太甚。那可久住。子孫不得已。又命肩輿送其還山。行過市廛。人多見之。其身長如十三四歲童子。白髮垂胸。爪長數尺。甫出城。舁者覺肩上升行漸輕。察之身漸縮小。未幾纔如初墮地之嬰。尋斂不見。輿中僅存瑪瑙煙瓶一具。以獻。其子孫寶之。以為宗器。

記海鹿門別駕少時事

海保字鹿門。裔出自襄陽孟氏。先世忠毅公喬芳。以從龍勳。隸旗籍。累代有顯宦。君幼侍尊人。宦遊三吳。容止玉立。風神愜定。讀書過目輒了了。弱冠從李申者先生兆洛遊。極愛賞之。兼精騎射。擊刺拳勇。超躍諸藝。性喜任俠。負氣好義。見不平事。不惜以身殉之。姑蘇元妙觀者。一郡遊觀之藪也。士女日集。恒萬人。無賴惡少。見遊女少具姿首。必環而尾之。甚至一人唱呵。萬聲應響。四方攢裹。將隻身婦女。迫困重圍。姿意戲侮。手摩足弄。無所不至。既將中履

簪珥分劫擄去。名曰打圈。在婦女之寡廉鮮恥者。不以為辱。反以為榮。以為必已之色貌。過人方應斯選。且常誇述於人。自鳴得意。而少知自愛者。不幸遇此。亦不免羞憤。欲絕緣陋俗。相沿既久。浸習成風。都人士視為慣常。恬不為怪。是以薦紳閨閣。有事至觀祈禱。必乘肩輿。從健僕左右護持之。非示夸也。實畏打圈耳。君少時嘗同人球一雛女。得免打圈之辱。其事甚快。故為誌之。先是女郎偕一童遊觀中。猝遇眾無賴。窺其意不善。亟攜童踉蹌反走。無奈眾齷綴要遮。女東亦東。女西亦西。評頭論足。肆口穢謔。涎視眈眈。不少寬縱。愈逼愈緊。醜態百出。女郎不堪其黷。宛轉嬌羞。氣急敗壞。倉皇四顧。正無計得以幸脫。適君同人至此。目擊其狀。義氣填膺。忿惱莫遏。慨然謂同人曰。承平世宙。豈有人家弱息而聽強暴。公然肆虐於光天化日之下。我輩不救護。誰救護者。諸君其謂之何。倘激於義憤。惠然禦侮。仰暴扶良。僕不敏。願助一臂。同人笑曰。君又選事也耶。人家兒女。何預卿事。君白眼爭曰。誰家無兒女。奈何受狂。且窘辱若此。諸君既忍心袖手。不肯向前。僕當獨身任之。言訖。攘臂躍入人叢。橫身要截。厲聲叱曰。止。止。鼠子。不得無禮。眾無賴正猖狂暢意。聞君言。怒答曰。吾儕逢場作劇。若何人敢敗乃公事。彼此硬語牴牾。一人遽前以掌摑君面。君向身疾出腋下。反掌搏其背。復以趾踐之顛。一人踵而前。又顛之。連踏四五人。餘乃不敢繼起。始紛紛鳥獸散。女郎之圍以

解於時旁觀如堵牆。初以君文弱函莽。恐難撓眾鋒。今幸君勝。歡聲雷動。咸色喜耳。語竊謂何處少年重義氣。作此快舉。噴噴稱道不置。同人從而慮之曰。君但快心於一時。憚建義舉。然羣兇潰竄。怒形於色。必號召以圖報復。倘眾寡不敵。奈何。君曰。實偏處此。詎容中餒。惟今之計為德。不可不卒。請與諸君約。毋短氣。毋貳心。當同衛送兩小歸。縱與若曹遇。共擊無不利。僉曰諾。蓋君所同來五人。皆好身手。中有陳叟者。素號萬人敵。年近七十。精神矍鑠。猶能手格虎豹。餘四人亦各矯捷有膽略。因詢知兩小。固同懷姊弟。女郎年才及笄。含睇眴腴。意甚德君。告明居址。君領兩人作前導。女郎姊弟居中。陳叟率兩人殿後。行至飲馬橋。眾無賴果召集百數十人。執梃當路。決皆向君。欲得而甘心焉。陳叟須髯怒張。大聲囑君。與四人第擁其姊弟。從間道急行勿却。顧若曹來。有老夫在。當以老拳飽之。君既送女郎至家。其父母審悉巔末。感涕稱謝。欵洽甚殷。然匆遽間。兩忘問姓氏。至今君不知其父母為某某。其父母究亦終不知君為何許人也。眾無賴見君等護送女郎去。且速又以陳叟獨作後勁。咄咄逼人。料非恒流氣為之奪。竟不敢犯君。嘗笑謂人曰。是役也。固光時選事。但其時亦恃有陳叟在。故吾敢向前。假令爾時吾亦袖手。則陳叟不肯為力。女郎危矣。其少時負氣好義。類如此。里葉子曰。君從李申者。先生遊肆力於詩古文詞。向同在高瀆營次。相得甚歡。丁巳冬。君攝

事巴城予特造訪時當歲暮風雪淒然封篆無事君素嗜酒命童燃爐燒燭手巨觥撚髭縱談往事精悍之色猶見眉宇今濶別且有十餘年矣每一憶及之殊令人神往於蘇長公遇方山子時也

紀夢

道光乙巳夏大興朱子澤刺史甘霖攝靈璧縣事遇予皖城執手喜曰頃將之任靈璧考邑志其地實垓下舊壤故有虞姬墓歲久蕪圯將事修治碑文非燕許不辨請以屬予予再避而後諾爰為駢文一首郵寄刺史勒諸貞珉雖一時盛誇人口然非青儷白體製較卑尋亦不復記憶越明年丙午自金陵秋試歸阻風烏江時當八月下弦孤蓬岑寂憑窗露眺涼風浣襟殘月窺幙江天一色盪滌塵慮心暢神爽儼然欲寐忽見一古裝美人嫋姚登舟容采照耀後侍兩婢亦復娉美予愕貽避席不知所措美人乃前斂衽曰妾與先生固有文字因緣故涉嫌就教休得驚怪予亟答拜曰一介鯁生伏處窮巷不省何處得侍夫人所謂文字因緣備替莫解請明諭其旨以開愚竇美人笑曰妾乃西楚虞姬是也前朱使君澤及枯骨知碑文出自椽筆崇論偉議使妾讀之千年幽憤頓為一池昨同戚妹往東海壽上亢夫人過我王廟宮順道一訊起居將歸瑤池稔知君舟楫此特詣謝鉅製耳予憬然避曰仙姬真

情烈魄愧。咫尺聞庸。見不能掄揚。萬一辱挂齒頰。反增汗顏。姬曰。先生勿過搗謙。文信必傳。但承襲譽過情。未免感極生愧。妾尤喜叙次論斷。多與當年情事符合。方恨與君風馬懸隔。晤言無自。今亦既遺止。良夜正長。願畧將梗端。為先生道之可乎。予曰。幸甚。爰敬展茵榻。肅姬上坐。再三固讓。乃抗禮就席。叩以當年情事。姬蹙然曰。君所論楚漢之仁暴強弱。毫釐不謬。龍門作史書。以本紀具有深心。惜我王婦人之仁。猶豫寡斷。當日若聽妾言。季何能為。予曰。奈何。姬曰。君固不知鴻門之計。妾所與謀。不圖范玦空舉。壯劍無用。既縱季去。亞父恚甚。急趣妾力爭於王。且援吳越已事相況。謂勾踐一去。夫差恐終不免。王故不樂妾干預軍政。比聞妾言。怒視叱曰。誰嗾而言。而婦人焉知大事。君文所謂鴻門之計不行。烏江之禍已伏。恰中當時窳要。使妾至今思之。猶有遺憾。予曰。垓下之戰。何遽一敗塗地。乃爾。仙姬當日。身處其境。其何以堪。姬喟然歎曰。君言及此。祇令人悲。彼日漢兵匝。薄暮小雨。黑雲如盤。妾侍王帳中。方計秣馬厲兵。決一死戰。夜分忽聞楚歌四起。王拊髀垂涕。願謂妾曰。大事去矣。卿將若何。孤悔不聽卿言。致有今日。妾泣慰王曰。王但自愛。速自為計。妾荷王厚遇。自有以報。幸勿以妾為念。王聞妾言。益悲不自勝。乃作垓下之歌。泣以付妾。妾知王意有所授。遂勉和其歌。擊所佩之劍。自剄於王前。以明無貳。姬語至此。珠淚猶盈盈。承捷不勝悲哽。予亦為之欷。

戲但見一侍者出淡紅綃帕前為拭淚。一侍者執碧霞唾盃前承其唾。予勸慰曰。仙姬久歸仙籍。興念往事。只合當作他人成敗。聊供判斷。慎勿過事傷感。有損玉抱。况當日青鋒決絕。大節皦然。較息媯西施等輩。轉眼憐人。其薰猶相去。何可以道里計哉。姬歎息謝曰。此是先生藻獎。然若曹所為。妾實羞之。寧死不願效也。予曰。不揣再有所請。未審仙姬當日毅然死別。後事猶能知悉否。姬曰。妾身雖死。魂固在王左右。王見妾已死。號慟失聲。恐人踏藉。妾屍命軍校裹以毳旃。昇瘞淺土。王乃獨騎決圍而走。予曰。王所乘驢馬。究竟何若。姬曰。驢乃神驥。日行千里。先三日前蹄忽蹶。王恨以為不祥。後所乘似驢。而實非此。亦天意。倘驢足不蹶。其涉水如平地。何至及烏江之難。王歌所謂時不利兮。驢不逝。正謂此也。予曰。王歌激昂慷慨。仙姬和章。必能相敵。今所傳五言。恐是膺鼎。姬曰。妾歌倉卒失傳。正幸藉以藏拙。乃村儒必欲代彰其醜。妄為擬作。不知妾歌雖屬急就。固非五言。究亦不足溷大雅之聽。予堅請賜教。姬乃誦曰。愁雲黧墨兮風聲悲。楚歌四起兮中心淒。擊王衣兮前致詞。大事已矣兮妾將安歸。妾安歸兮事已矣。願王保重兮妾為王死。誦畢歎曰。巴里卑音。聊抒哀緒。君其勿哂。予側聆嘿識。深為歎服。二侍者便趣姬行。云恐戚妹久待。姬曰。先生非外人。良覩匪易。况夜尚未闌。何妨小坐。予叩七妹為誰。姬曰。戚妹乃戚夫人。固非七妹。予曰。何不偕來。曰。以君文譏為

人矣。故羞與相見。予曰：此乃呂后悍妒所致。史臣筆之於書，並非小生唐突。姬曰：固然。但渠素映弱，妾亦不得相強。予曰：仙姬何獨與彼同行？姬曰：妾前身本王母第九女。渠乃阿母侍兒。既先後同嬰塵網，各歷一番苦趣，再返天曹，遂畧除前分齒，以姊妹。予曰：仙姬此後曾再誕人世否？曰：上帝念妾無辜，應得為后，以贖前恨。曾一降世。予問何朝？曰：在唐。問為誰后？姬羞不答。堅叩之。乃答曰：武后。予輒然曰：武后生平，所謂顛仙姬，判若兩途。曾自知否？姬歎曰：輒屢一踏，本性便迷。後果前因，茫無省憶。予曰：今天曹尚別有一武后否？姬曰：有之。替換託生，各為爾我。譬如樹之分植，一樹可分數樹，一身亦可分數身。即妾而論，妾自一人，阿母之九女，又自一人。武后又自一人。顧各具一形，即各賦一性，亦由一樹所分枝葉，疏密斜整，終各不同耳。予為首肯。因笑問曰：武后為人不類仙姬，却畧似呂后。未審仙姬在日，曾與呂后相見否？姬笑曰：豈惟相見，渠嘗留我王後宮，樂不思漢。妾鄙其為人，勸王縱之。予笑曰：得母樛木盛德，有所難容。姬曰：非也。妾固能容渠，渠反不能容妾也。予曰：身後曾受赤眉之辱，信有之否？姬曰：此事固不足信。渠沒時齒已頽衰，距新莽二百餘年。縱使朽骨如生，亦非韶妙賦。雖淫暴夫復何圖意者？後人恨其所為，造作此言，以快道路傳聞之口。未可知也。但君文感歎漢事一段，可謂才人之筆。面面俱到，妾每循誦及此，輒復破涕為笑。予謝不敢因叩項。

王為人何若。姬曰：平居燕私，雍容退讓，有類文士。一着甲冑，便赳赳可畏。又問：今王與仙姬皆返仙班，偶一晤對，尚憶及夙昔兒女之私否？姬面發赤曰：蛻脫人寰孽緣，盡割偶一晤對，儼見大賓。倘少涉妄想，一經上帝覺察，又不知譴謫墮落幾重塵劫矣。予深悔失言。因又問：仙姬佳城果否？有定遠葬首之說？姬曰：否否。王初瘞妾之地，妾允田安實知之。漢兵去後，即為遷葬。今處其時，有一侍兒亦死塚下之難，貌微肖妾，或誤為妾首，持以獻季，即今定遠所葬者是也。重以後人好為博會，亦何足怪？姬詞鋒雪霽，予甚心折。方欲再有所叩，忽聽村鷄遙唱，侍兒又前相趣。姬乃興辭曰：本願稍憩，藉罄積愆。緣人天境隔，且有戚妹相待，未便久稽。爰解佩玉一方，持謂予曰：此妾在日，極所玩弄，珮諸窮衿。葬時幸未遺失，今以貽先生，聊作潤筆。先生珍重。言訖，率婢珊珊凌空而去。予木立神馳，正深怛怛，忽聞榜人相呼，解纜遽然驚寤。知為隱几而夢。然殘燈明滅，薌澤猶存。果於枕旁檢得一玉，長二寸，寬一寸，有半厚盈二米。其色堅潤潔白，上鏤藻火粉米等形，精緻絕倫。的是漢物，不知來自何處。洵可寶也。急援筆記之，以誌夢中文字緣也。

附錄重脩虞姬墓碑

靈璧之南，塚下之舊趾也。其東則虞姬之墓在焉。嗚呼！煙銷白骨，古戰場鬼哭時聞。露暴

黃腸幸從人魂歸何處。茫茫千載。纍纍一坏。尋廢臺之存亡。慟前朝之成敗。重瞳休矣。大王行婦人之仁。執手卷然。賤妾貴英雄之恨。興念及此。能不悲哉。鄉者勝廣倡亂。餘耳。景從竿木。皆兵鋒。銳競熾言。姁恭謹未分。項暴劉仁。意烏猝嗟。方謂楚強漢弱。試逐中原之鹿。可奏膚功。恐誅當道之蛇。轉為噬語。而乃羹未分於俎。上劍空舞於筵前。一着棋輸。六州錯鑄。經戰陣者七十。敗北如斯。失子弟者八千。引東何忍人心。既畔天命。有歸。蓋鴻門之計不行。則烏江之禍已伏。當其漢軍僂蹙。楚唱悻惶。慨赤手兮難支。喚紅顏兮無侶。森嚴刁斗。吾末如何。顛賴胭脂。誰能遣此。引杯看劍。揮涕牽衣。聽震耳之鼓聲。慘斷腸於兜女。拔山力竭。徒嗟騶足難前。畧地聲哀。贏得娥眉先殉。噫嘻。可謂難矣。彼夫勾踐既報夫差。西施轉歸。范蠡反顏。事虜。伊獨何人。向使姬以桃花命薄。逐水東西。柳絮身輕。隨風來去。則息媯嫁楚。縱令生子。不言甄后。歸曹。未免有人平視。而乃飲刃計決。匪石心堅。拚一死。所以報恩。庶千秋斯無遺憾。原情畧跡。在天可配英皇。國破家亡。入地不同褒姒。君子謂姬貞而有操。烈而不污。諒哉。嗟乎。金刀運盡。玉匣尸寒。主業同霸氣。俱銷。尺地與一民。安在。嗚呼。人甦生罹重耳之災。呂號野雞。死受赤眉之辱。以視姬之就義。凜凜伸志。昭昭完大節於生前。留清名於沒後者。其得失為何如耶。或謂定遠之南。亦有姬墓。彼葬其首。此

葬其身。花歌草舞。傳會有之。頭公腹嵩。荒唐頗甚。間嘗考其圖史。按其山川。知倉皇遇敵之時。正宛轉捐生之處。金鈿委地。指故壤之未湮。紫玉成煙。信佳城之不遠。竊恐星霜屢易。瓦礫交叢。石髮既滋。溪毛莫薦耳。今令尹大興。朱公憑弔芳嶽。主持韻事。披榛掃徑。伐石豎塋。醉旨酒以招魂。徵新詩而表烈。不使阿環羅襪。獲見人間。庶幾玉釵金釵永藏地。下。江山無恙。風月自佳。茂草徧鋤。野花如繡。香埋淨土。青冢則怨吳明妃。墨灑新碑。黃絹則詞慚幼婦。

舒伯魯郎中燾評云。偶效南朝徐庾體。娓娓可誦。至贊姬好處。原是平心之論。虞兮有知。當感泣地下。為君一作楚舞也。

王研雲學博寶仁評云。筆意大似陳如陵。而非偶之中。暢發議論。又如陵所不及。

里乘卷八

蘭茗館主著

小衛玠

山右衛生世家子也。兒時穎悟過人。溫其如玉。十三歲應童子試。學使者命題面試。賞其文以為神童。拔冠一軍。且謂其學校官曰。此小衛玠也。異日當清貴。可善視之。由是小衛玠之名噪於一爨。遐邇皆傾慕之。願妻以女。生益自負。擇配殊不肯草草。願幼失恃怙。而家甚寒。年將弱冠。述好尚虛。生攻苦彌篤。自以為青紫唾手可得。但有千鍾粟。何患無顏如玉也。邑鄺翁者。家稱素封。有女珊柯。年及笄。美而慧。女紅之餘。酷嗜翰墨。翁與人酬應書札。類皆倩女代筆。翁益愛憐之。嘗誇謂戚黨曰。我家有掃眉才子。若聞閨閣科。何患不狀元及第也。生是遴選東牀。頗難如願。一日。珊柯與嫂五臺禮佛歸。途中適與生遇。珊柯秋波頻睨。情殊惓惓。嫂窺其意。情謂之曰。小姑知此人乎。此即鄉里所稱小衛玠者是也。渠與家兄為社友。過從甚密。故識之。小姑如有意。當使兄為執柯。珊柯紅暈於頰。笑而不答。既歸。思慮綦切。飲食俱廢。嫂固與珊柯善。不時省問。珊柯喟然低聲謂嫂曰。我亦不解何故。他日歸後。魂魄若失。似此懨懨。恐非佳兆也。嫂戲慰之曰。小姑得毋為小衛玠乎。果爾得諧伉儷。的是嘉耦。當即

風示。渠央吾兄來請命於翁。無不諧也。但其人才豐境。書家徒壁立。與相如等。未審小姑患貧不。珊柯嘆曰。實告嫂氏。妹壽之已熟。命好貧亦可富。不則富亦可貧。富貴在天。有命存焉。何患貧之與。有惟嫂氏圖之。嫂笑曰。如此易矣。小姑請自保重。不三日必有以報命。珊柯大喜。厥疾頓瘳。里有某公子者。父官粵東太守。卒於任。宦囊充牣。公子扶櫬歸。服闋。年甫十八。適聘妻某氏病卒。耳珊柯名。倩媒求婚於翁。翁慕公子門第多財。遽喜諾之。嫂聞之。知難挽回。乃備告珊柯。且婉勸之曰。非嫂方命。奈翁已許公子。雖智如良平。亦難為計。聞公子少年才貌。亦不減小衛玠。况門第家道有過之。而無不及。可見婚姻大事。自有天定。人力斷不能與造化角勝。似此天作之合。未嘗非福。小姑亦何必甲彼乙此。沾沾然成心不化哉。珊柯聞之。無可如何。祇得惟父命是聽。亡何吉期已屆。公子親迎。演劇宴賓。備極華侈。夜分客散。入房更衣。復出自私。突有人掩出其後。以刀洞其胸而殮之。其人疾入房。吹滅燈燭。知珊柯坐牀上。入幃。遽抱求歡。珊柯以為公子。賊問君何為者。如此鹵莽。其人低答曰。我我非公子也。乃小小衛玠也。感感汝意。特特來謝。珊柯驚曰。公子行且至矣。宜速去。毋使兩有不便。其人曰。公公子我我已及之。可請放心。珊柯駭曰。汝真言耶。曰。那那敢相誑。珊柯頓足失聲大哭。曰。汝累我矣。奈何。其人知不可犯。又恐人至。急摸取珊柯髻上簪。出房拔關竄去。比婢媪等

聞珊柯哭聲。各秉燭來問訊。見珊柯披髮汗喘。慘無人色。爭前問故。珊柯具告。所以衆大驚。急出覓公子。果見洞胸僵仆地下。血流徧地。須臾合宅男婦畢集。公子兩弟未及成童。撫屍大哭。平明具狀訴於邑宰。詞內並牽連珊柯。保無知情。邑宰即率伍伯來驗。時當暮春。見公子身着短袷。俯仆地上。果係出其不意。被刺身死。乃拘生與珊柯分別研訊。珊柯哭稱。素與生漫不相識。實不知情。及至訊生。生素未登公堂。驟見有司厲聲叱詰。倉猝莫知所對。情殊惶恐。邑宰信以為真。遽請褫革巾衿。備加榜虐。生不堪酷刑。遂致承服。爰書既訂。直延頸以待秋決。珊柯雖不知情。以事出有因。亦不能遽釋。出獄會按察某公。由牧令起家。陳臬晉省。慮囚及生。頗疑其冤。思為平反。而苦不得法。夜夢一人持銅鏡一枚。擲地碎其半。而存其半。歌曰。銅鏡如月。半明即滅。先缺後圓。先圓不缺。寤後尋繹夢兆。味後二語。忽有所觸。乃投計獄吏。淨除一室。備設牀幃衾枕。縱生與珊柯聚處其中。以察其情形來告。獄吏如命。並具有酒。延二人至。而告之曰。公子一案。業已定讞。憐汝二人。實一雙嘉耦。生離死別。近在指日。特具不腆。聊與稍叙。決絕勿却為幸。二人俱再三固辭。獄吏笑曰。我不過一片哀矜之心。並無他意。請勿疑慮。決不使長官知之。言訖。鑰扉徑去。初五臺途中之遇。珊柯因嫂知生。而生固不曾留意於珊柯也。自公子獄起。生以為珊柯素無仇隙。意外橫遭誣陷。殊深抱恨。至珊柯雖

有意於生。自遭公子之變。頗恨生凶暴。前念頓灰。茲被鑰於一室。彼此相視。未免心動。珊柯見生溫文爾雅。似非殺人之。人。即或如此。亦因愛我起見。我幸免禍。而彼指日即正典刑。究竟與我毫無所染。徒喪厥生。情殊可憫。一種憐生之心。不覺時形於色。生雖嘗耳。珊柯豔聲。未曾見面。即獄起偶與對質。更不敢公然平視。今近在咫尺。細意領畧。果信名不虛傳。因憶獄吏之言。死期伊邇。與其徒坐虛名。不如暫圖實樂。縱正典刑。死亦無憾。乃強顏向前。揖珊柯而嘆曰。小生與娘子。平日並無仇隙。一旦橫遭誣陷。果何故耶。珊柯腴腴久之。嘆曰。君所作事。君自知之。妾縱不無憐君之心。然殺人者。抵有國法。在於妾何尤也。生嘆曰。卿今日尚以為殺人者真小生。聊以卿視小生。力乏縛難。豈能殺人者。即卿既苦口相坐。百喙難解。但枉彼虛名。心實不甘。卿如慈悲。俾得一親肌膚。死亦瞑目矣。言訖。便拉珊柯求歡。珊柯聞生所言。心甚淒然。雅不欲拒。解衣並寢。曲盡綢繆事已。珊柯問曰。始君口喫。而狐臭之氣刺鼻。今何不爾也。生笑曰。小生向無此疾。卿何所見而云然也。珊柯因述曩日公子被害後。其人滅燭入帷。所聞實係如此。然則果非君耶。生嘆曰。事已至此。想是夙冤。今蒙卿見憐。何復尤怨。珊柯又將五臺歸後。如何抱恙。如何與嫂同謀。慙慙為生具述一過。生不勝感激。嘆曰。小生繆承錯愛。若非娘子。述及至死不知。然此中消息。得毋漏洩。俾奸人乘機假冒。致嫁禍於

小生乎。珊柯嘆曰。閨房祕語。人何由知信。如君言果係含冤。然後書既訂。料難平反。君如屈死。妾誓相從九原。決不獨生也。二人喁喁細語。獄吏潛聽甚晰。一一轉達於公。公笑曰。得之矣。亟密召鄴翁至。問曰。汝家梅甫來往人等。有口喫而狐臭者乎。翁沈思久之。對曰。平日來往人等。惟衣工金二朋者如此。公曰。是矣。亟飛簽拘金至。公見其氣象猛鷲。料非良善。據案叱曰。汝殺某公子。嫁名衛生何也。金固口喫。聞公言頓驚失色。口中喃喃猶欲強辯。公叱左右搜其身。果得質券一紙。贖取驗之。即珊柯當日髻上簪也。公笑拈以示金曰。贓物已得。汝猶欲辯耶。叱令痛笞之。果吐其實。先是金幼從師學為衣工。在翁家製衣。比長所業甚精。翁家男婦衣大半皆金手製。及珊柯長成。所需衣裙。非金製不着。金嘗聞珊柯美。恨未一見。珊柯偶往省姪氏。金竊窺之。不禁狂喜。以珊柯衣非已製不着。謬幸於已有緣。時萌妄想。有某媪者。向在翁家服役。固與金有私。前珊柯與嫂所謀衛生一事。不料媪屬垣有耳聞之。戲述於金。金久欲圖珊柯。正苦無當。聞媪言陡生惡計。乘公子親迎。潛入其宅。拚為孤注一擲。計殺公子。假冒生名。當可遂願。即不然。嫁禍於生。已亦可脫然無累。至是盡吐其實。以金坐抵而生冤。以白。公念生無罪。幾陷大辟。訶責邑宰。及承訊各官。使為媒。以珊柯妻生。並罰釀贖助資。資生膏火。以贖其讐。聞者無不嘖嘖稱頌。公始悟夢兆。銅鏡擲碎其半者。僅存二金字。

也。歌詞銅鏡如月。半明即滅者。月合半明為明字。統合之。金二明即滅也。後二語謂生與珊瑚。當為夫妻。先有缺陷。而後團圓。然必先暫使團圓。而後乃無缺陷。故曰先缺後圓。先圓不缺也。公初授計獄吏。固是揣度結句。而有所觸。不謂果以此而獲真犯也。生出獄後。喜妻珊瑚。又得所助。鹹賞益發奮。下帷尋聯捷。入詞館。秩躋清要。士林傳為美談。足徵學使品藻不謬。里察子曰。聽訟折獄。談何容易。聖門七十子之賢。獨許仲氏。其難可知也。小衛玠之獄。邑宰頗鍛鍊。遽訂爰書。使非按察某公。設法平反。幾何不沉寃莫白。可見天下斷無難折之獄。如事關人命。尤不可草草聽斷。至萬分疑難。亦必審慎。進回澄思。渺慮務求水落石出。不使稍留餘憾。否則生殺自由。視人命如草菅。漫不如意。彼蒼昭昭。難保不無冥報也。某公精誠所格。見於寤寐。授計獄吏。神妙莫測。可以為法。所謂思之思之。鬼神通之。觀此足證古人田中走東門草之說不虛也。

婉姑

前明世廟時。浙江紹興某甲。少遊京師。學為銀工。心性慧黠。所製務出新式。極臻奇巧。一時長安良匠。僉避謝不逮。以故都中戚畹勳貴。及一切仕族。凡閨閣釵飾。非出某手不貴。緣此出入顯者之門。累貲數萬。甲有妹名婉姑。素所鍾愛。年已及笄。姿首妍麗。幼字同里某乙。以

貧故不能至京親迎。甲又以事繁不得送歸。時以為慮。曾有中表弟某孝廉公車北上。依甲為居。停試畢下第將歸。甲置酒祖餞。數巡後。甲以朱泚盛朱提一函列几上。前再拜。致詞曰。僕有心事。思之數年。未得其人。今幸得吾弟。此願可了。吾弟少年豪俊。且係至誠君子。倘荷允諾。乃敢畢其詞。孝廉見甲情詞懇切。答曰。我爾骨戚。如力所能任。自當如命。義何敢辭。甲遂以婉姑相託。謂已不能躬送。今吾弟南旋。敢請挈帶歸里。就便為之完姻。曷勝感幸。謹具箋箋聊助資斧。勸勿以不腆見却。孝廉感其情親。誼厚。遂毅然允諾。既抵浙。孝廉即留婉姑在家。小住數日。涓吉送其于歸。某乙惟有老母。婉姑既嫁至乙家。翌日晨興。見乙與其母皆為人所殺。駢死厨下。大駭。喊呼。鄰舍畢至。覘驗猜異。互相驚詫。因其鳴官訊究。明府某公。少年科甲。素以精刻自負。勘驗畢。先後拘婉姑并孝廉至。廉得同路回籍情事。乃拍案作色厲聲曰。此案不待問。固已瞭如指掌矣。以怨女曠夫。同行數千里。且皆少年美好。旁無一人。謂一路彼此防閑。歷數月之久。能始終作魯男子。吾不信也。命虔婆驗婉姑。果非處女。某公更以自神益得意。曰。何如。吾言固不謬也。遂命以嚴刑相加。慘掠倍至。二人不任。萋楚。祇得誣服獄。具論以大辟。時人亦同聲稱明府之神。且冊罵婉姑同孝廉人面獸心。有負某甲之託。死不為枉。某甲在京聞之。駭異。懊悔亦以二人之非人類。罪有應得。既又念婉姑自幼相依十餘

年。向以禮自守。言笑跬步。不稍苟且。即孝廉為人。亦少年純謹。邊幅甚修。何遽作此。蔑禮犯法之事。以此沈吟。疑信不能自決。緣離鄉多年。暫將店務。倩人督理。自旋展墓。藉傾訪此事。跡耗。甲故京師名匠。北道大店商賈。多與往來。日者至一典店中。正與主人談次。忽見店夥持金釧一股來。請於主人曰。此釧製法精巧。因質價太昂。不敢自主。特請命以定去留。某甲從旁見釧大驚。泣謂主人曰。此乃小人女弟于歸時贈嫁之物。今幸無意見之。則死者之冤可白矣。乃具為主人道其原委。請將質釧之人。用計留禁。自詣轄邑。鳴鼓上狀。飭役拘質釧者至。一訊而服。先是某甲以某乙家寒。恐妹嫁去。難以治生。遂廣製金釧數事。約計千金。以作粧奩之資。質釧人本京師劇賊。探知此事。沿途尾婉姑。孝廉之後。直至浙江于歸日。乙家以貧故。合盃成禮後。諸親便各自辭歸。賊乘人眾時。預伏厨下。乙母至厨。料檢什物。賊暗中突出。以双揮而殪之。乙聞撲擊聲。自往燭之。賊又突出刃之。遂將乙衣履更換。東燭進房。婉姑新至。不辨真偽。就寢後。賊以言囚婉姑。云聞汝兄贈嫁有金釧數事。製法精巧。何不出以相示。婉姑以為己夫也者。乃盡將所有出而獻之。賊大喜。佯為稱讚不已。又與同寢。天明。聞婉姑睡熟。盡搗所有而遁。賊之所供如此。邑令以狀上大府。移知浙省。並以入告世廟。震怒。除賊寸磔外。命將該邑令。即素以精刻自負之。某明府處決論抵承訊。在事各官。自督撫以次均

嚴加議罰。又特旨婉姑給予旌表建坊。孝廉子給蔭入監讀書。恩法兼施。存歿均感。然則折獄者。慎勿以精刻自負矣。

里蔡子曰。子嘗謂折獄有三不可。一不可忽。二不可動氣。三不可執己見。忽則曲直是非未盡分明。便已潦草結案。倘有不實不盡。不惟有害於人。兼亦不利於己。動氣則一坐公堂。如臨仇寇。不問情繇。橫加鞭撻。如係罪有應得。固不為過。假使波及無辜。問心亦復何忍。在鄉曲良民。平日無事。見官已多恐懼。汗。况有事拘質公堂。一見官長。怒威相加。縱有十分冤情。亦殺棘不敢上達。有司更復執以己見。則筭楚之下。何求不得。雖逞一時之威福。差自快意。而魚肉蒼生。鑿傷元氣。恐一旦權移勢奪。興盡悲來。作孽既多。報施亦復不少。某明府少年科甲。素以精刻自負。遇此大獄。遽命以嚴刑慘掠。誣服具獄。所謂三不可者。某明府兼而有之。厥後世廟震怒。罰令論抵。此真罪有應得。夫復何怨。吾願世之為民父母者。倘遇大獄。皆當以此為鑒。

某氏子

某氏子。類年出外貿易。家惟一母一妻。母老而且盲。賴婦賢孝。藉針黹以供甘旨。晨昏定省。不敢或虧。姑婦二人相依為命。他日某氏子歸。母喜命婦烹雞食之。中夜某氏子暴亡。鄰里

以為異。烏之官驗之果是中毒。邑令疑婦有私。倍加撈掠。婦不勝其苦。遂誣服。問奸夫為誰。婦本無事。况所識素無多人。倉卒間。遽以十郎對。十郎者。某氏子在服之弟也。初某氏子出門時。囑十郎時為省母。藉代支理家政。十郎年少誠謹。以受某氏子之託。時至其家。經理甚周。母與婦甚德之。今婦迫於嚴刑。不得已。以十郎塞責。令簽拘十郎。見婦泣曰。嫂氏云何。婦亦泣曰。叔叔語未畢。已哽咽不能成聲。令見其情狀。拍案叱之曰。奸夫淫婦。在公堂之上。猶不知恥。而靦然人面相對。嚶嚶作兒女子醜態耶。乃不容十郎置。下橫加鞭楚。死而復甦者數次。十郎無奈。亦遂誣服獄。具論辟行有日矣。巡撫某公者。公明仁恕之大君子人也。慮囚至此。心甚疑之。以問幕賓。會幕賓方與其徒圍棋。正專心致志。不遑旁贊。乃漫應曰。此獄已具屬吏。不知費幾許推敲。料亦無所冤曲。公又何必故意駁誌。致滋多事耶。某公乃不復平反。婦與十郎遂均坐大辟矣。是夜漏三下。幕賓將就寢。忽聞門外剝啄聲甚厲。審是婦女聲音。怪暮夜何得有婦女來。此叱令速去。聞門外厲聲答曰。爾不開門。我豈不能入耶。故見一女從門罅入。披髮喋血。怒視幕賓。戟手指而詈之曰。爾以布衣為軍門上賓。不過粗識得幾個之無。使謂精熟申韓。詭騙居停。坐享厚俸。以人命為草菅。毫不詳慎。昨妾此案。中丞方欲平反。不恥虛懷下問。倘能迎機裏贊。或得一線生機。而但以圍棋故。支吾漫應。以致妾等冤

情不能昭雪。妾死固不足惜。惟弑夫惡名。心實不甘。妾已請於帝。許向爾索命矣。言訖便欲向前撲攫。幕賓駭汗如雨。急長跪請於婦曰。某罪誠應死。但離家年久。尚有八旬老母。能容回家一訣別否。婦應曰。念而孝心。姑寬貸一月。而宜速歸。遲則無及矣。言訖恨恨而去。某見婦去。毛髮豎立。詰旦謁居停。具以實告。治任馳歸。匝月果卒。中丞某公聞而駭異。乃改裝易服。親詣某氏子家。見媪備審。崖末聞替媪泣且詈曰。客爾何知吾兒之慘死。不知其由。惜有司昏憤。不加詳察。誣我賢婦。坐以大辟。傷哉冤也。公佯問何謂也。媪曰。客固不知。老婦與彼名雖姑婦。恩逾母女。終朝廝守。坐卧不離。何由有私。乃有司刑逼誣服。聞巡撫某公。公明仁恕。獄上萬一。希冀或得平反。不謂亦一體設霧。誣正典刑。沈冤莫白。惜老婦殘年向盡。又以目廢不能上叩九關。一為申雪耳。公又問十郎為誰。媪曰。彼乃老婦之猶子。吾兒出門時。以老婦及家政相託。少年誠謹。德反成讐。想業由前世。夫復何說。公不勝歎息。既詰得食雞一事。後託腹飢。出錢命代市一雞。倩人烹好。即置於鄉日子所具食之處。乃一葡萄架下。公留心默察。見熱氣上薰。少選架上一絲下縋。直入碗中。非竭目力不見。公知有異。取一齋飼犬。犬斃。乃謂媪曰。爾婦之冤。我能代申。爾姑待之可也。媪不解所謂。但合手稱謝而已。公將熱雞裹以旋署檄邑令。及承訊在事各官。至以實告之。眾喏喏相視。若不深信。公隨命呼一犬至。

飼以雞一鸞。果立斃。衆始服罪。命人往搜。架上得一蝎長四寸許。蓋所絕之絲。即是物也。公乃以實告。自請議處。邑令以誣擬論抵。餘各議罰有差。又請以賢孝旌某氏婦。以義士旌十郎。各建坊以慰冤魂。媼着地方有司優卹。以終餘年。制曰可。此獄幸賴中丞之賢。卒得暴白。向使幕賓因居停來問。一經詰駁。斷不致令賢婦義士抱屈九泉。觀其暮夜叩門索命一節。洵屬快事。可不慎歟。可不慎歟。

里察子曰。某氏子之獄。巡撫某公疑問幕賓。向使幕賓聞公之言。細意重究。未嘗不可覆盆得雪。乃貪戀手談。漫應了事。致使含冤地下者。暮夜前來索命。彼鬼所責之語。句句中的。幕賓雖有百喙。不能置辦。鬼念其孝心寬貸一月。得以歸正首邱。誠為儆倖之至。竊惟吾儒讀書讀律。出膺民社。折獄一事。切不可自恃精明。稍事疎忽。先賢曾子有言。如得其情。則哀矜而勿喜。是得其情者。尚當哀矜。况未必盡得其情者乎。書曰。罪疑惟輕。功疑惟重。又云。與其殺不辜。寧釋不經。此數語。與曾子之言。實可互相發明。凡司刑名者。皆當時存方寸。則子惠元元。造福無量矣。

媚鄉

巢縣富室某翁。五十無子。惟一女名媚鄉。美而慧。年十四。猶延師教之讀書。諸子百家。過目

了。翁夫婦皆鍾愛之。凡泉刀出納。皆歸經理。每晚讀罷。紀綱僕魚貫而入。屏息立左右。白事畢。先後呈簿請會計。女耳聽目察。口咨手畫。無毫釐差謬。眾咸敬畏。不敢稍欺。翁嘗曰。古云。生女雖避男。慰情良勝無。若我媚鄉。正恐男子中。亦未易多覲也。初隣舍某秀才有子。曰恂。生長女一歲。髻齡即與女同學。齒相若。情亦極相親。丰姿頴悟。亦甚相埒。見者皆歎為天然。嘉耦。翁夫婦亦以為然。但以貧故。未之許也。一日師飯後來。熟見女被人殺死地上。大驚。急呼翁夫婦至。驗之。女下體衣襖褪。私處傷痕狼藉。血流至踝。審是強奸迫殺。翁夫婦睹此情狀。慟徹於心。疑必恂生所為。遂指名訟之官。並賄求必以恂生議抵。而甘心焉。邑令某公健吏也。既受翁賄。又默自因事揣情。亦不甚徑庭。遂將恂生嚴刑敲楚。迫勒具供。以逼奸致殺。加等坐抵。師以約束不嚴。失察釀禍。議流二千里。某秀才僅此一子。雖心知其冤。以家貧無力營救。况素性懦蕙。但坐視其誣受大辟而已。師故邑名諸生流。至闔省士林中。憐其非罪。又仰其文名。故多樂與之遊。會尚書某公子。告在藉。欲延名師。以課其子。公選閱多人。都不當意。或以師薦尚書。命取平日所為制藝讀之。大為讚賞。聘幣相延。極稱契合。師適需理髮。命呼整容匠至。甫入戶。瞥見師踉蹌返走。師甚詫異。以其面熟。猝難省憶。以叩公子。云。比來待詔。乃師鄉人。不知何以見師返走。師聞為鄉人。頓覺省悟。迺瞿然曰。是矣。臨我於此者。

始即此賊也。蓋此匠本與富翁同里。幼即出入其家。彼日亦因將為師理髮來。熟見惟媚。癖在此作書。更無他人。不禁頓起淫心。強拉求歡。撐拒問恐。女聲喊恰。有一切書刀。遂按而刺之。懷刀而奔。又恐獄終。及已乃逃亡。轉徙至閩。不圖忽與師遇。深慮行蹤敗露。故心虛情怯。猝見師急欲迴避。師初固料不及此。今見其形迹可疑。因憶此獄。初興時。彼便無故去。安知非畏罪而遁。爰以情告尚書。拘送有司。果一械盡吐其實。閩撫以師無罪。具文咨準開復。并將整容匠檻解回籍。訊實定罪。此獄已越六七年。某秀才正以慟子卧病。忽師歸述知此事大喜。沈疴頓減。謀與師聯名上控。務求昭雪。時前邑令已游擢郡守。奉準公文。情知錯悞。又聞師與秀才將謀上控。恐不利於已。乃倩人關說。以重資啖二人。求罷控。初固不許。既念死者不能復生。又貪重資。遂不復控。惟將整容匠瘐死獄中。

里蔡子曰。鄉聞此縣令。由翰林出膺民社。素號健吏。此獄以賄。故不肯詳察。鍛鍊坐抵。致使無辜儒童。含冤地下。可謂憎極。然天道之巧。其師議流不於他處。而在閩省。俾與真犯相遇。事越六七年。卒使覆盆得雪。誠屬快事。惟師與某秀才。但貪重資。不肯聯名上控。不然縣令雖擢郡守。焉能逃罪哉。

清苑縣某氏女

直隸清苑縣有兄弟伯仲。析爨而居者。仲無行遺產蕩盡。賴伯友愛。時調濟之。伯年逾五旬。僅一子弱冠。娶某氏女。速好甚。敦會仲妻以急通。詣伯求助。伯子暮從市中歸。腹苦飢。某氏女方晚炊。伯子遽索蔬飯食之。七竅血暴湧。逾時頓卒。某氏女惶恐失措。奔告伯夫婦。相持慟哭。幾不欲生。仲妻瞪目旁哭厲聲曰。伯年半百。僅此一脈。今無辜暴死。某氏女不能辭其咎矣。若置不究。其如死者何。予夫婦忝期服親。決不稍貸也。歸訴於仲。遂偕伯夫婦共鳴之官。直控某氏女毒死親夫。官使伍伯驗之。確係服毒致死。乃嚴刑拷訊。某氏女荏弱。不能耐五木。遂誣服因奸起見。並指某甲為奸夫。某甲故中表親。雖讀書未成。而素行不苟。拘至畏刑。亦直承不敢置辨。爰書已定。將付大辟矣。適訥近堂制軍。移節總督直隸。慮囚至此。案疑其不實。欲平反之。明府某公者健吏也。聽訟為一時之冠。因公晉省謁制軍。訥公告以此獄命為平反。明府以案踰三年之久。業經多官研訊。又條大辟。不敢承鞠。訥公怒讓之曰。君久膺民社。素著循聲。若不昭晰此案。是視人命如草菅。似此畏難規避。吾將以白簡劾之。勿謂老夫無情也。明府不得已。細覈歷年案牘。厚幾盈尺。觀其屢斷屢翻。其中情詞實有可疑。爰命拘集在案諸人。隔別細研。見某氏女與某甲均辭氣溫和。不類殺人者。益信其冤。又訊伯夫婦。僉謂某氏女入門後。事舅姑甚孝。夫婦亦曾無詬辭。且未見某甲往來。是非有無。不敢臆

斷訊至仲妻。則厲聲哭罵。謂賤婢以奸斬伯氏之嗣。不付大辟。不足以服死者云云。詞色悍暴。殊非良善。明府諦審久之。忽拍案叱謂仲妻曰。下毒者非他人。即汝是也。汝毒猶子。奈何誣某氏女乎。仲妻失色。極口叫屈。明府怒命嚴刑拷之。不肯遽服。時方冬月。白日映訊。至漏三下。猶未吐實。夜半忽陰風慘慄。屋瓦飛鳴。滿堂燈燭。幽綠如螢。眾見一大蜈蚣長二尺許。蜿蜒由戶外馳入。仲妻禪中。屢詫為異事。急命褫揮搜之。不得。明府知為冤鬼作祟。益命加刑。仲妻知不可掩。乃盡吐其實。蓋仲妻久欲吞白屋。每至伯家。必懷砒少許。伺隙投之。恰值某氏女晚炊。睨其無人。遂潛下焉。固欲酖伯一家。及伯子以飢先服斃命。遂乘機嫁禍。某氏女亦計之至得也。至此吐實。始共頌制軍慮囚之神。且歎明府不愧為老吏。斷獄或請於明府曰。公何以知為仲妻也。明府笑曰。是不難要在聽訟者。留心察言觀色耳。彼姑舅且不敢臆斷。而仲妻竟敢直聲其罪。令人可疑。況其日適至伯家。更露破綻。姑試恐喝。不謂竟成信讞也。爰以仲妻抵罪。又以某甲無辜株連。遂以某氏女妻之。並嗣為伯後。

里樑子曰。此獄據舅姑供稱。某氏女入門後。事舅姑甚孝。夫婦亦曾無詬誶。且未見某甲往來。是非有無不敢臆斷。而訊及仲妻。則厲聲哭罵。竟敢從付大辟。揣情察理。原有破綻可尋。惜粗心人不能細意領會。一經健吏聽斷。便難掩飾。察言觀色四字。的是聽訟要訣。吾願為

民父母者。凡遇折獄。皆當以明府某公為法。然非制軍。則明府雖有才。亦不肯用。尤願為大府者。慮囚當以制軍為法也。

杜有美

太原諸生杜堅。字子密。世席厚貲。藏書甚富。壯年生一子。命名有美。字小甫。杜有妹嫁同里諸生盧某家。亦小阜。有女名慧娟。與有美同月生。杜妻鄭與妹極相得。以故妹時歸寧。小兒女常易乳而哺。相愛各不啻己出。既齒日長。容貌都美。情亦日親。年已十三。俱未婚配。凡為有美執柯者。鄭意在慧娟。悉却之。試商之。妹亦首肯。歸以告盧。盧素迂拘。以有內戚嫌。殊不以為可。妹讓之曰。腐儒何太不脫頭巾氣。只許我杜家人嫁汝。不準汝盧家人嫁還我家耶。况我姪殊不惡。亦未必有玷汝女。我業已許之矣。生女當由母作主。勿預父事。汝休得過問。盧大怒曰。汝何太不通道理。古云。女子三從。在家從父。出嫁從夫。夫死從子。我一息尚在。不惟慧娟當從父命。即汝亦當從夫命。今我不肯締婚。汝焉敢擅專耶。夫妻反唇相稽。幾至反目。初杜妹歸寧。每攜慧娟與俱。自議婚。後盧不許慧娟再往。有美偶來省視。亦不許慧娟相見。中表從此路人矣。有美與慧娟一經睽隔。思慕甚殷。荏苒倏逾兩年。情實俱開。益難為情。而兩地相思。祇可自喻。各不能掬心相示。有美無可奈何。倩畫師寫太真獻鏡圖。自題一詩。

云狡獪温郎絕世才。風流不厭自為媒。三生幸遇金閨彥。一笑親陳玉鏡臺。將畫與詩賄某媼。密付慧娟求題。以察其意。慧娟正苦思有美不知可否同心。見畫與詩。喜感交并。爰拈筆端楷題一絕於軸末。以答其意。曰。兩地相思兩不知。玉臺一獻當紅絲。老奴伎倆何難料。請待良宵却扇時。題畢。仍倩某媼攜歸。有美有美見詩。朝夕焚香披誦。如獲異寶。由是兩心遙遙相印。各以嫁娶自誓。惟苦不得。遂不覺懽懽俱病。醫藥罔效。杜夫妻與妹皆知兩人致病之緣。籌有以破盧之執。妹曰。腐儒外固而內慈。非以計劫之不可。允嫂可無慮。我自以報命。杜夫妻大喜拜謝。並求速為玉成。妹諾之。盧固鍾愛慧娟。見其病甚。綿懽實深。愁鬱會杜妹歸。盧問有美病狀如何。妹怒答曰。殆不起矣。何勞汝問。盧歎曰。我正慮慧兒疾革。不謂汝姪亦爾。妹白眼相視。詎之曰。一雙好兒女。皆為汝殺耶。夫復何說。盧驚問何謂。妹唾其面。曰。老物尚夢夢耶。若自幼哺同乳。寢同席。比長相親相愛。此人情也。既知親愛。則必欲偕伉儷。以圖永好。此尤人情之常也。聖人制禮。尚緣人情。偏汝老物。拘執成見。竟不曲體人情耶。自汝拒婚後。若即俱病。病且日劇。殆皆不起。我實不忍仰息。見若俱死。請先自剄於君前。泉下當撮合。若仍成嘉耦。以償夙願。老物又將奈何耶。言畢。袖出匕首。長尺有咫。瑩然如雪。擲置案頭。錚錚有聲。指謂盧曰。我兩人結褵廿載。請從此別。盧瞪視良久。曰。卿且少安。毋

躁容再商議曰我志已決復何商議曰然則允若婚配卿可不死否杜妹笑曰果爾若疾當已我又何必求死盧曰如卿所言卿重母黨嘗自譽其姪我本俗人不喜白衣女婿必俟汝姪讀書成名方準親迎可乎杜妹笑曰有何不可吾姪喜如所願必能刻志用功又何患不成名耶盧曰若是汝可歸告兄嫂速遣冰人來當遵前命杜妹乃袖刀而藏翌日歸告兄嫂大喜遂委禽焉兩小聞之疾俱若失有美果下帷攻苦歲試補博士弟子員越歲食餼秋闈一戰捷於鄉杜妹聞報喜曰若今可以親迎矣盧猶欲待禮闈後再議杜妹抵之曰汝始終不免固執科名遲早難定吾侄鄉薦已屬徵倖人生能得幾回徵倖青春幾何何忍令其孤負耶盧不得已準其親迎杜夫妻大喜遂涓吉為兩人畢姻同里有周生羣生者皆名諸生以杜藏書多皆襍被下榻其家與有美同窗肄業意氣相得周生是科亦登副車情誼益洽吉期當九月下旬杪秋天氣已涼未寒屆期周生竊語羣生曰有美與慧娟天生嘉耦得諧琴瑟然費周折當此良辰定情不知若何歡洽我兩人當設法偵聽以快所聞羣曰唯唯是不難青廬上是藏書之樓我與爾預伏樓上天好偵聽正竊議間適有美在屏後聞之點首匿笑嘿籌預防之法先是有美之乳母朱媪有子曰阿笨遊情無賴酷嗜賭博負輒盜杜家物典鬻以償賭逋有美親迎鋪張務極奢華慧娟固盧愛女粧奩亦頗壯觀杜素惡阿笨行

止不端。患其盜物。戒關者不許入門。阿笨果早萌眩惑之念。以杜家不許入門。心益銜之。是日新娘下輿。觀者如堵。阿笨在人叢中。恩上書樓。計俟人靜。蹈隙行事。漏二下。賓客甫散。有美脫去冠服。將次就寢。慕憶日間周生言欲覘二人所為。以博一笑。乃躡足輕步上樓。於時殘月初升。阿笨正憑闌凝眺。有美窺之。以為必是周生。悄從背後出。兩手於面反掩其目。阿笨固強有力。意有美特來。詞已既驚且恨。急回身緊抱有美頸。而扼其喉。須臾氣絕。倒卧樓上。時慧娟坐幃中。方命伴媪出具湯沐更衣。見有美躡足上樓。不知何意。俄聞樓上窸窣作響。心甚訝之。阿笨見有美已死。陡起惡念。欲犯慧娟。爰脫衣履。塞藏書箱下。將有美短褐棍鞞。下自着之。大步下樓。知新娘在幃中。亟吹滅雙燭入幃。遽抱慧娟求歡。慧娟念有美平日溫存。何忽狂暴。况兩人述好不易。今幸覩面。無數款曲。合當絮訴。何將燭吹滅。得勿有所不嫌耶。心殊不快。阿笨近身。遂極力撐拒。阿笨知難強合。急探手脫去慧娟兩腕纏臂金。並摸索頭上簪珥等物。慧娟益復駭異。適伴媪秉燭攜沐湯進房。阿笨恐被人窺破形跡。急以袖掩面。奪門越牆而適。伴媪不知誰何。大驚。急燃雙燭。舉帷見慧娟披髮汗喘。神魂不定。叩問所以。慧娟備訴。頃間情狀。方共詫愕。忽聞樓上欬欬有聲。命伴媪燭之。則見有美亦身卧樓上。吁息不已。蓋扼喉一時氣絕。須臾氣復流行。故得再生。然暴甦身體綿軟。猝難起立。伴

媪另取衣履着之。緩緩扶掖下樓。偃卧繡榻。嘿不一語。慧娟情不能忍。急覩覩傍身。低問所苦。有美自指其喉。搖手令其勿語。慧娟莫喻其故。只得怏怏對鏡。縮髮添粧。以待延至五鼓。有美甫能起坐出聲。彼此各述所見。互相慨嘆。有美以為素待周生不薄。何竟如此惡作劇。繼念雖劫去釵珥等物。猶幸慧娟不為所欺。又復轉怒為喜。然變出意外氣血。究難驟舒。竟體疼痛。未免良宵虛度矣。是夜客散。周生以中酒酣卧齋中。韋生以周生既醉。遂獨自歸家。及周生酒醒。見韋生已歸。趁月色甚明。亦踉蹌歸家。將出大門。會司閹者起溺。見周生。暮夜短衣着褲。倉皇徑去。形跡可疑。詰旦舉室喧傳。昨夜之事。証以司閹所見。僉謂必周生無疑。杜固長者。以慧娟幸不受辱。又不欲暴人之過。徧戒家人。秘勿播揚。不圖盧某聞之。勃然大怒。特造杜面數其諱盜之罪。且言周係名士。所行如此。是誠衣冠禽獸。似此澆風不整。轉相效尤。何以為訓。乃具狀訴諸邑宰。邑宰素與周相契。見狀大駭。招周至署。以狀示之。周閱之。駭汗滿面。謂韋生曾有此說。後各歸家。實無此事。小生雖不肖。亦斷不肯逢場作戲。戕人之生。以圖苟合者。尚祈明公察之。邑宰亦信周決無此事。慰令暫歸。爰使人風示盧某。為周辨誣。欲寢其事。乃盧固執莫解。謂確有左証。復何誣枉。如邑宰左袒周生。便當赴懇大府。以求水落石出。展轉牽纏。兩年有餘。未敢定讞。亡何邑宰任滿。遷去新令。某公素號健吏。閱及此

牘反覆細意尋繹。越日集兩造會審。公一一研究。拈髯尋思久之。忽有悟曰。無論是否周生。所為杜家釵飾等物。固明明有人劫去。且據若曹言。有美赤身卧樓上。短褐棍棒。被其人着去。其人自着衣履。必脫藏樓上。搜得衣履。便可昭晰。乃自率吏役。親往樓上窮搜。果於書箱下。索得破衣棍鞋襪數事。並腰囊內有信一函。閱之。固某某與阿笨招賭書也。公笑曰。得之矣。付兩造觀之。始各恍然。亟命拘阿笨來一訊。盡吐其實。周寃以白。迺遇頌神明焉。

里槩子曰。諺云。好事多磨折。觀此而益信其言不謬也。夫有美慧娟。天生嘉耦。其為婚配。宜也不謂盧某固執拒婚。業許婚矣。又必俟成名。方準親迎。向使有美遇同梁灝。將奈之何。不遇如盧隱。又將奈之何。所幸一戰而捷。公然準其親迎矣。乃偵聽之。謀眩匿之。舉突爾湊合。致使變生意外。虛度良宵。所謂好事多磨折者。竟如是乎。邑宰為周辨誣。第欲顛預了事。憤憤可笑。一經健吏聽斷。是非立見。要之讀律。無異讀書。苟能得閒。自無不析之義。特患粗心人。不肯反覆細意尋繹耳。彼頌神明者。豈有異術哉。

守貞

中州某甲。少失怙恃。弱冠娶妻某氏。伉儷甚敦。甲有族叔在京貿易。因挾薄貲往依之。頗有營獲。十年始歸。夫妻久別重逢。情倍親切。晚間滅燭登牀。甲縱體入懷。忽狂叫一聲。頓絕。某

氏大驚。急起火而燭之。則見血流殷席。甲勢已闔。割不留餘蒂。竟不能再甦矣。某氏抱尸大哭。駭懼悲慟。莫測所以。詰旦親黨鄰舍畢集。互相猜疑。以某氏帷薄素謹。何忽罹此慘變。乃共商議。不得不具狀懇官。官諮諸幕友。謂必因奸謀殺無疑。官然其說。窮詰某氏。備受拷虐。卒不肯承。展轉年餘。不能定讞。而某氏奄奄一息。尋將瘦死獄中矣。勾越有商先生者。年逾七十。精申韓家言。老遊中州。善斷疑獄。官厚聘。延至。與議此獄。商閱爰書。再四思忖。固疑某氏冤枉。爰招某氏至審。其舉止溫存。語言和婉。毫無凶悍之態。益疑之。乃屏去左右。諭令某氏。毋羞。毋恐。可將當日牀第情形。從直縷述。我當設法為汝雪冤。某氏見商皤然老者。溫霽和藹。知非輕薄者。聞言感激。垂涕稽顙有聲。應將當日牀第情形。一一從直縷述。商拈髯諦聽。忽然思得一法。諭令某氏歸房。赤體偃卧。毋容覩覷。乃索猪肉少許。切作人勢狀。以鐵鈎貫其中。命接生某媪。將肉塞入某氏陰道中。以覘其變。某媪如言試之。陰道中果有一物。力啣其肉。如魚吞餌。然急拔出視之。其物長七寸許。竟體黃毛。四足修尾。酷類鼈鼉。始悟某甲變生意外。固是物作祟也。見者無不咋舌稱異。僉曰。非商先生高見。而某氏之冤。終難暴白矣。或謂此物名守貞。亦名血鬻。婦人暮年多有之。他如老處子。比邱尼。亦間有之。大率多因曠怨鬱結而成。然究不知出何書。當俟質之博雅者。

腿殼龜

揚州某甲家頗小康所蓄雞鴨犬豕等物無故多亡去舉家竊竊稱怪亦姑聽之忽有遊方
丐者過其門嘿相其室卒然問曰君家蓄物頗多亡去否甲曰然汝何由知之丐冷笑曰君
禍不遠矣不亟亟預防之人且難保何況物乎甲駭問汝有術可解否丐曰此妖物作祟不
知伎倆何若試可乃已功成當以錢十千緡犒我作沽酒資否則勿怨也甲曰諾丐命導其
徧相宅中至厨見水甕一具瞪視良久曰殆在是矣乃命市猪肉一方煮半熟以鐵鈎貫其
中繩繫其端縲柱上將熟肉置水甕畔人遙從壁隙窺之果見甕下一物聞肉香探首出張
血口遽啣其肉鈎挂喉際痛甚急縮首欲遁緣繩縲柱猝不能脫丐急出將物縛住令甲視
之狀如守宮長尺有半丐曰此腿殼龜也厥名曰蜥因質甲曰君幸遇我此物化尚未久易
制再過年餘便能變化食人即非人力所能制君家將無噍類矣甲大驚因意家固蓄一大
龜亡去年餘意即是物所化試以叩丐丐曰是也乃共覓其殼果於猫竇得之蓋竇狹殼寬
龜偶入竇如狶觸藩猛力向前遂腿殼化為此物丐謂此殼為化骨妙藥或去齧齒或去癩
疽腐骨皆立效可善藏之爰索利刃將此物剝為肉泥凡地上血跡剗刮淨盡盛以瓦缶坎
窪深山之中笑謂甲曰小人為君料理盡然可以高枕無憂矣甲喜欵以酒飯酬錢十千而

去越歲甲家客作。暑天畏熱。取門支牀露宿。詰旦竟體化為水。惟髮獨存。甲大驚。急訴於有司。驗其形跡。茫無端緒。甲坐是繫獄。而家業蕩然矣。忽前丐又來見。甲家狀甚蕭條。怪問甲妻。妻告之故。丐自批其頰曰。此小人之過也。蓋當日殺此物時。曾有點血濺門上。以不足為患。故未拭去。不謂竟波及客作。亟赴有司。為甲訟冤。試取雞犬置門。血迹處果俱化為水。官賞丐者。而出甲於獄。

里蔡子曰。此揚州土人為予言之。鑿鑿可據。並謂其殺。今尚存樂肆中。惜未一見之也。褪殼龜殿名曰蚺。究不知所出何書。彼丐者不惟有術。且亦博雅。有司賞之宜也。吾愧丐者。

某令

甘肅某令精明幹練。能伺長官喜怒。嘗有劇盜多名。歷久躡緝不得。檄某令往捕。乃與長官幕友謀。出貲另購七人。申報塞責。長官聽幕友言。遂將七人付諸大辟。某令一日從外歸。忽心如刀割。痛不可忍。俄頃大叫一聲而卒。某令素嗜飲茶。其鬼忽附妾身曰。快烹好茶我飲。我近為七人所訴。受刑甚苦。爾曹速焚紙錢。以濟我用。多多益善。又囑妻妾等。應如何奉養老母。如何教育諸子。所遺官貲。應如何經營。生活一一處分畢。便以手拊胸嘆曰。我今日悔之晚矣。眾審其聲音。言笑舉止。固宛然某令也。少選鬼去。妾甦問之。茫然。後有扶鸞者降壇。

係已故謝明府謝固忠厚長者。沙書陰曹。以我生前為人正直。命作此方土地。近為某令七人一案。日在城隍廟訊辨。頗甚勞形。人問公素與某令同寅。能賜袒護否。曰陰律不比陽世。絲毫不敢徇情。不但某令。恐將來某幕友。亦要到案對質也。此吾邑張德昭在甘肅所目見。為子言之。並云現某幕友已漸頹敝矣。

里蔡子曰。觀某令之鬼。以手拊胸歎曰。我今日悔之晚矣。嗟乎。千古權臣猾吏。及一切小人。到撒手時。大都同不免。有此一歎。惜乎。當勢燄炙手時。皆夢夢而不自覺耳。孽海茫茫。不早回頭。雖悔何益。

孫明府

山右孫翹江明府。一字蘭皋。以進士為直隸肅寧縣令。元旦各廟拈香。回道遇女鬼。從至署內。聲言索命。且謂明府前世亦姓孫。宰肅寧。女為強暴所污。堂判和奸。致女羞忿投繯死。係某年月事。尚有舊牘可稽也。明府命吏稽舊牘。果有此案。官果姓孫大駭。乃牒城隍詰問。既係前世冤。何以遲至今世甫報。越日明府夢城隍傳諭云。汝前世甚孝。且居官好。再世故復以甲科來宰是邑。鬼何敢報。今汝政聲頓殺。鬼得乘間而入。汝何尤焉。明府知冤難解。不得已向鬼乞憐。鬼不肯。再三哀之。鬼曰。雖貸汝命。亦不容汝在此作宰。明府無奈。乃上其事於

大府時潘陽琦侯為直隸總督。檄保定守熊公往詢鬼附明府身。歷歷訴寃。守復命琦侯異之。為抗疏暴白其事。改孫校官回籍。此道光十六年事。葛菊人史仲皋皆能言之。

里粟子曰。後閱福建梁敬叔筆記。亦載此則。舊案在乾隆五十一年。孫前世姓黃。保定守熊公。名守謙。字虛谷。或曰河間守。

倪公春岩

倪公春岩廷護。由進士出宰吾皖潛山縣。廉明公正。四民愛戴。皆呼之曰倪青天。公嘗於冬月有事至鄉。忽有蠅成羣飛繞輿前。左右揮之不去。意時方苦寒。那得有此。得勿冤鬼作祟耶。因嘿祝如有冤屈。蠅當導我為之伸冤。祝畢。蠅果羣飛前導。不里許路過一山。旋風驟起。將羣蠅捲入山中。公急命停輿。自徒行入山跡之。步上山凹。見一坟新築。濕土未燥。羣蠅栖集其上。心益驚異。比呼停長。問知為前村某甲新塚。聞甲年幾何。向作何生業。何疾而死。家中尚有何人。亭長對謂甲年二十許。家頗小康。少失怙恃。並無兄弟。家止一妻。亦無子息。聞係病瘵而死。又問甲妻年幾何矣。對曰。小人不知。大約與甲齒相若耳。公點首尋思。乃命輿徑至甲家。直升其堂。召其妻出見。問話。甲妻某氏。聞公至。大驚。急毀粧斬齋出。拜伏地乾泣。公見某氏態度妖蕩。知非善類。乃厲聲謂曰。我至汝家。非為別事。緣昨夢夜見汝夫。亦身喋

血跪我牀前。訴稱被汝所害。橫遭慘死。哭求伸冤。汝知之乎。某氏聞公言。急起趨入屏風後。與公抗辯。硬語牴牾。公見其暴悍。益信其必非良善。即召其族長。並左右鄰至。一一研詰。所對大畧與序長相同。再四鈎稽。茫無端緒。公心終不釋。乃執意開墓啟棺檢驗。以決其疑。僉謂關係甚重。倘檢驗無據。恐於公多有不利。公笑曰。我以窮措大微俸。弋復科第。忝膺民社。如遇冤獄。不為伸理。其何以為民父母乎。我意已決。如檢驗無據。甘心坐罪。雖粉身勿悔也。詰旦乃率領族長。左右鄰等。登山開墓。啟棺甲屍。以天寒絲毫未曾腐壞。伍伯承公意旨。由首而足。由腹而背。細意檢驗。竟無微傷。惟骨瘦如柴。確係病瘵而死。公無奈何。只得仍命蓋棺封墓。某氏大聲訶曰。公以莫須有之言。開人之墓。啟人之棺。翻覆人之屍骨。死者何辜。遭此荼毒。既啟棺而又欲蓋之。既開墓而又欲封之。此非未亡人所敢從命也。公笑謝曰。汝言良是。吾已具文請命於大府。甘任其罪矣。死者無辜。而令其暴露。是亦重吾之罪也。吾何忍焉。卒命蓋棺封墓而去。公已具文上請。復自踵謁大府。面陳梗概。大府素重公之為人。此舉殊怪。公孟浪。例應登諸白簡。難以袒救。公請展限三月。當密加訪察。如真不得確耗。甘罪無悔。大府許之。公旋任路經城隍廟。式與嘿祝。祈神示夢。夜果夢城隍神。遣人贈萬年青草一盆。驚寤不解。所謂乃易服貌為卜人。至鄉訪察。日晡見一漁人垂釣河濱。就而問路。漁人戲謂

先生善卜。能卜小人。今日釣得魚若干。當作東道主。否則此處苦無逆旅。恐栖止無所也。公信口戲答曰。卜汝連得三魚。計重五斤有餘。一尾烹以款客。兩尾兌錢。行沽果連得一鯉。一魴。一鯽。鮮美可愛。漁人大喜笑曰。先生其神仙耶。何言之驗也。寒舍不遠。敢請稅駕。公笑從之。不半里至其家茅屋數椽。一老嫗當門而坐。笑問漁人歸何早也。漁人笑曰。兜幸遇神仙。卜應連得三魚。早然。因將鯉付老嫗。請烹以待客。又笑謂公曰。此老母也。幸尚强健。年八十有二矣。齒目俱幸無損。惟重聽耳。因請公少坐。自攜兩魚。就鄰翁兌林酒一大瓶而歸。老嫗烹魚已熟。漁人請公南嚮坐。老嫗西嚮坐。自居主位。北嚮坐。老嫗不能飲酒。飯罷獨自歸卧。公與漁人酒量俱豪。薦魚勸飲。意甚相得。公問知漁人姓萬。並問何以當此壯年尚無妻室。漁人笑曰。先生謂小人尚壯年耶。小人今年已六十有四矣。里黨見小人生平不形老態。因共以萬年輕呼之。自知命薄。不樂有家室。徒以老母在。不然早以披髮入山矣。公聞萬年輕三字。頓憶前夢。因笑以言餽之曰。君何言之激也。我相汝大運將至。如娶妻當連得二子。老福甚隆。慎毋自棄時。漁人酒已微醺。益復忘形。聞公言急搖手曰。天下最毒者。莫如女子。娶妻一事。請勿再言。公笑問何謂。漁人但搖首不語。公曰。暮夜無人。汝有何意見。告我。何害。漁人歎曰。先生長者。當不泄語。小人少酷嗜賭。負輒偶作穿窬。藉償賭債。以懼罹法網。輒而改

業。昨醉後有友邀賭大負。不得已聊作馮婦。稔知前村某甲家頗小康。久病卧床。尚易為計。時夜漏三下。甲宅僕媪俱已睡熟。萬籟寂然。予由屋一躍至地。見甲房燈尚未息。姑伏竄窺之。乃不窺則已。窺之真令人駭然也。公問如何。漁人又搖首不語。公曰。業言之矣。復何囁嚅為也。漁人復堅屬曰。先生必無泄言。乃敢畢其詞。公正色指天信誓。必不泄語。漁人乃謂小人伏窗潛窺。但聽病人卧床呻吟。其妻側坐牀前。黑黑若有所思。忽起身挑燈燃燭。向牀後招手一男子。輕步而出。兩人附耳小語。其妻出絹一匹。登牀將甲口纏閉。兩人又將甲扛下。縛伏行狀。褫禪露尻。啟蓋出一小蛇。將蛇首納入竹管。以竹管對尻。取香火炙蛇尾。蛇負痛由穀道竄入腹中。聞甲大喘一聲。其氣遂絕。兩人相視而笑。復解甲縛。扛置牀上。小人慘不忍睹。復一躍上屋。恨恨而返。至今思之。怒髮猶為上指也。先生試思。娶妻如此。有何恩愛。豈非天下最毒者。莫如女子耶。公曰。甲如此慘死。其親疎豈無一人肯為伸冤耶。漁人嘆曰。甲雖慘死。身無微傷。何由伸冤。昨聞甲鬼託夢求倪青天伸冤。倪公開墓啟棺檢驗。無傷。將來不惟去官。並有餘罪。此真抱屈也。公笑曰。汝何不投官自首。當得重賞。漁人搖手曰。否。否。倪青天最惡穿窬。如言不見信。不惟無賞。恐反受罰。不如安分緘口為妙。公又笑曰。我相汝晚福甚隆。即此未嘗不是機緣。汝其圖之。漁人搖首不語。詰旦公與漁人作別。返署。急遣人拘

萬年輕至。公招至記室。漁人戰兢伏地不敢仰視。公拈髯笑曰。汝第舉首。尚識卜人否。漁人仰視公。急叩首曰。小人死罪。求公見恕。公笑慰之曰。我不汝罪。汝其母恐某甲之寃。汝肯為具控。不吝厚賞也。漁人叩首答曰。謹從尊命。謹從尊命。乃具詞控。塑公立飛簽。拘某氏並族長左右鄰至。令漁人與某氏對質。某氏猶強辯不已。公謂非再檢驗不可。比具文上達。並叙入萬年輕之詞。爰重率眾登山開墓。啟棺時。交仲春。甲屍已潰爛。臟腑畢見。腸中死蛇猶存。公令某氏觀之。某氏猶不肯承。公怒甚。叱鞭其背。某氏嬌不勝刑。乃吐其實。初某甲得疾。某氏有中表兄時來省視。甲疾日劇。某氏料不能起。遂與表兄有私計。甲死當據其產。永為夫婦。甲雖綿悞牀蓐。一息粹難可絕。適見丐者。蓄有小蛇。二人有觸於心。以百錢購得。而致甲命。死果無傷可驗。智亦巧美。自是甲寃既白。某氏凌遲處死。其中表兄立斬以殉。公又命族長擇族中子姪立為已嗣。以延血食。遐邇聞之。無不稱快。公感城隍示夢。刑牲致祭。以酬之。又以此事。非萬年輕莫白。且嘉其孝。乃召母子至署。為萬娶妻生子。給錢小作貿易。俾溫飽以終身焉。

里藥子曰。公自筮仕吾皖。歷宰劇邑。所斷奇獄甚多。皖人至今猶津津樂道之。其最著者。莫如某甲之獄。好事者已譜入傳奇。播之管弦矣。偶閱蛇階外史。載黎襄勤公世序。宰江西時。

曾雪冤獄與此相類。願同一用蛇致命。此由穀道竄入腹中。彼由口竄入腹中。為小異耳。

張船山先生詛盜

遂寧張船山先生。問陶以翰林出守萊州。恃才傲上。上官以先生才望素著。皆優容之。會長白某公巡撫山東。先生來謁。公謂其無禮。心甚嫌之。語方伯曰。萊州張守。書生結習未除。太守為一郡表率。渠能勝任耶。方伯固與先生齊年契好。為之說曰。張守雖係書生。聞尚不誤民事。時有劇盜。桀驁狙詐。屢翻屢斷。承訊官皆莫可如何。公冷笑謂方伯曰。君謂張守不誤民事。如盜渠能定讞。當即令其旋任。否則予將登諸白簡。莫怪老夫無情也。方伯唯唯出語。先生問君能定此讞否。先生笑曰。有何不能。方伯大喜。商諸廉訪。即延先生至臬署。訊盜僉問先生計幾日可以了結。先生笑曰。此細事耳。三日足矣。又問需用何刑。先生笑曰。刑具俟用時再議。所最要者。金華極精乾脯一大盤。紹興佳釀一大甕。藉此聊助舌鋒。斷不可少。僉笑曰諾。翌晨先生至臬署客廳。箕坐炕上。几置金華極精乾脯一大盤。階下置紹興佳釀一大甕。一僮扇爐暖酒。一僮執壺侍側。一書吏在旁錄供。呼盜踞膝前。先生左手把杯。右手翻閱案牘。而問盜曰。汝邾城人耶。盜對曰然。汝年幾何矣。曰三十有七矣。汝居鄉乎。城乎。曰居城。汝有父母乎。曰小人不幸父母俱亡矣。汝有兄弟乎。曰兄弟三人。小人其長也。汝有妻子

乎。曰：小人有二子，長年十八，能獵獸矣；幼年十三，尚未能獵獸也。汝家何業也？曰：無所事事也。斯時方伯與廉訪諸公俱在屏後竊聽，以先生素工言語，必能摘奸發覆，不料所問皆瑣瑣細事，殊與原案無涉。會相視匿笑，又恐不能了結，無以復某公之命，深以為慮。越日先生至臬署，又問盜曰：汝邾城人耶？盜對曰：然。汝年幾何矣？曰：小人今年三十有九，明年且四十矣。汝居鄉乎？居城乎？曰：居鄉。汝有父母乎？曰：父早亡，母已下堂矣。汝有兄弟乎？曰：兄弟三人，小其次也。汝有妻子乎？曰：小人有二子一女，皆孩提也。汝家何業也？曰：薄田數畝，務農為業也。諸公俱復竊聽，以先生所問與昨無異，益復吃吃匿笑。至第三日，先生至臬署，方伯與廉訪問曰：君言三日了結，今三日矣，果能了結耶？先生笑曰：下官向不打誑語。今日下午當可了結。公等請無慮也。因傳諭皂隸人等預備刑具，聽候結案。先生至客廳，依舊箕坐炕上，以乾脯下酒，呼盜跪膝前問曰：汝邾城人耶？盜對曰：然。汝年幾何矣？曰：去年四十，今又添一歲矣。汝居鄉乎？居城乎？曰：時而居城，時而居鄉也。汝有父母乎？曰：小人有母，年逾七十矣。汝有兄弟乎？曰：小人有二兄，皆亡故矣。汝有妻子乎？曰：小人有子，呱呱在抱也。汝家何業也？曰：無田可耕，或漁，或樵也。諸公竊聽，益復相視匿笑，謂先生所問如老嫗絮語，何能定讞。至日晡後，先生乃命僮取巨觥來，連滿飲三巨觥，命將酒脯撤去，傳集皂隸，準備刑具聽用。先生

正色危坐而語盜曰。今當及正案矣。我觀案牘。前承訊各官。所獄一一屬實。汝何屢斷屢翻也。盜叩首曰。小人家又其事。尚可利客笑。生拍案叱曰。汝休矣。人謂汝桀驁狙詐。實屬不謬。我與汝絮語三日。皆家常瑣事。汝三日所答。前後迴不相符。瑣事尚如此。反覆。况正案耶。汝果從直吐實。尚不愧為好漢。如再敢飾言強辯。我即將三日所答瑣事。以証汝之反覆。雖嚴刑處死。亦不為過。汝須自忖。毋自討苦喫也。盜猶欲強辯。先生叱左右嚴為用刑。斃命勿論。盜急叩頭乞命。情願吐實。誓不再翻。先生大喜。立命畫供。具案遂結。方伯與廉訪諸公。在屏後聞之。歎服不置。比復命某公。公歎曰。名下固無虛士。不謂張守有才如此。今而後不敢輕量天下士矣。一時慙下傳為美談云。

張靜山觀察折獄

滇南張公靜山觀察其仁。由進士為蜀中令。所至輿誦洋溢。計典屢膺上考。道光乙巳夏。以蓮州牧特擢新安太守。甫下車。有兩姓爭墳互控者。稽核舊牘。自嘉慶甲戌年興訟。至是已三十餘年矣。公訖問書吏。何遲久不能判斷。書吏對謂此案每新太守莅任。例來互控。緣兩姓俱無契據。無從剖決。只合置之不理。公叱曰。天下豈有三十餘年不結之案。立命傳諭兩姓。五日後登山驗看。聽候判斷。翌日公沐浴齋戒。祈禱城隍。夜宿廟中。求神示夢。五日後

親自登山訊斷。兩姓俱至。一姓係望族。其人納貲以郡丞候選。衣冠華美。容止甚都。一姓係老諸生。年已七十許。貌甚寒儉。公大聲諭之曰。汝兩姓為祖興訟。歷久不懈。孝思可嘉。惟聞自經具控。彼此阻祭。為汝祖者。毋乃餒而實甚。汝心安乎。兩姓皆伏地稽顙。唯唯請罪。公笑曰。吾稽舊牘。見汝兩姓各執一說。皆近情理。所恨兩無契據耳。既思天下事。有一是必有一非。有一真必有一偽。非求神示夢。究不能決。昨特沐浴齋戒。禱宿城隍廟中。果見神傳塚中。人至。自稱為某某之祖。被某某誣控。求我判斷。我已許之矣。願一經明白宣示。真偽既分。是非立決。此後是其子孫。方準登山展祭。非其子孫。即不準過問。吾憐汝兩姓。皆係孝思。勞苦多年。孰真孰偽。孰是孰非。皆當別祖。過此以往。不能並至此隴矣。汝兩人以為何如。兩人皆稽顙對曰。謹從尊命。於是闔拈。老諸生居先。郡丞次之。老諸生迺勉整敝冠。次且走伏草服。草草三叩首畢。起身乾哭。顏色怛怛。口中喃喃不解所謂。公笑謂郡丞曰。渠已別墓次。當輪至汝矣。郡丞聞言。涕淚泣然。乃側身伏拜墓前。大聲泣曰。子孫為祖宗興訟。多年不辭勞苦。今郡伯禱神得夢。一言判斷。究不知真偽是非。可否不謬。倘所夢不實。為子孫者。此後不能與祭矣。興念及此。能勿悲乎。言畢痛哭。卧地暈不能興。斯時觀者如堵。見之無不測然太息。公笑謂眾曰。觀二人別墓情形。真偽是非。汝眾人當共喻之。尚待吾明白宣示乎。眾人等羅

拜對曰。微公言小人等皆喻之矣。因共贊郡丞為真孝子。而不直老諸生。公命眾扶郡丞起。拳拳獎慰。老諸生惶愧俯首。嘿無一語。公謂老諸生。汝別墓情形。眾目共見。撫心自問。尚充之說。老諸生。汗流滿目。自稱知罪。公笑曰。汝既知罪。吾亦不汝咎。但自今以後。憑眾剖斷。后歸郡丞。毋得再訟。汝心甘乎。老諸生唯唯聽命。誓無反覆。公乃親筆書判。令兩姓畫押。三十餘年難了葛藤。一旦斬絕。眾口稱快。蓋此山本郡丞祖墓。老諸生偵知。其久失契據。意圖騙占。初與郡丞之祖興訟。至郡丞已歷三世。歷任太守。皆意郡丞家為望族。未免欺老諸生。式微。咸有矜憐左袒之心。而孰知腐儒叵測。以樸陋文。其奸詐。向非公巧。以神道設教。黑白。何由昭晰耶。是年秋。公舉行郡試。延予襄校試卷。公固善飲酒。酣嘗為予述之。頗自得意。予叩公祈夢城隍。究竟果得夢兆否。公笑曰。此姑妄言之耳。吾思兩姓既無契據。只合令其別墓。以察其情形。果係真子孫。自有纏綿難捨之狀。否則出於勉強。倉猝間難。以掩著矣。大抵人即無良於稠人廣眾之前。斷未有甘心厚顏。而真忍以他人之祖為祖者。天良未盡。猶亡。祇在此刻人之所以異於禽獸也。吾懸揣此情。姑託言神夢。以微察之。不謂果以此。而竟決是非真偽也。合座聞之。無不歎服。予特筆而識之。凡留心折獄者。遇疑難事。亦可以此為法。而神而明之。存乎其人。是又未可泥而不化也。